

مسرحية

أبطال من البوسنة

تأليف محمد خطاب



شخصيات المسرحية:

سلوبودان : رئيس يوجوسلافيا

كاراديتش : زعيم صرب البوسنة

توديمان : رئيس كرواتيا

شخصيات بوسنية :

عائلة فاضل :

الأب : فاضل

الأم: فضيلة

الإبنة : نورا

زوجة الابن : هاما صربية وزوجة دينو

ابطال المقاومة :

شاكر — عامر — راجي — حميد — حسناء — رضوي — شيماء

معتقت بوسنيات :

علية — سلمى — جميلة

جنود صرب :

(الضابط — ميكولا — زلاتكو — ايفانوفيش)



اسير ١ — اسير ٢

مقدمة واجبة : قصة الأمس

كتب مصطفى كامل ٦ ديسمبر سنة ١٩٠٠

هذه بلاد البوسنة والهرسك فيها نحو المليون من المسلمين سلمتها دول اوروبا
للحكومة النمساوية

بحجة اصلاح ما أفسد الدهر من احوالها وتنظيمها وتقويم أخلاقها فزادتهم شقاء علي
شقاء واضطهدت الإسلام وعملت علي هدم العقيدة الإسلامية وتربية الأطفال علي
غير ما يريد

الآباء ويقضي الدين والجنسية فأبي أفضل المسلمين أن يرضخوا لهذه الأحكام القاسية
وارسلوا وفدا

منهم الي (فيينا) بقصد مقابلة الإمبراطور النمساوي (فرانسوا جوزيف) وعرض
شكاويهم بين

يديه فرفض مقابلتهم وأوحى إلي وزرائه أن يصموا آذانهم عن سماع كل شكوي ضد
هؤلاء الذين أخذت أوروبا علي عهدتها أن تبيدهم من الدنيا وقد كتبت الجرائد المجرية
وأفاضت عن المرمي الذي ترمي اليه حكومة مسيو دي كاللي فلم تخش ان تصرح

لقرائها بأن هذا الحاكم يود أن يري المسلمين في بلاد البوسنة معتنقين الدين المسيحي

ويعمل علي تحقيق هذه الأمنية بكل الوسائل

وبما يدبره عقله الواسع...صادروا الأراضي الزراعية وجلبوا من المانيا وبولونيا بعض

الرعاع الجائعين

وأسكنوهم في الغابات و الأراضي التي سلبتها من أغنياء المسلمين وأخذت في نشر

المبعوثين الكاثوليك في أنحاء البلاد وعممت نشر المبادئ المسيحية في المدارس

التجهيزية وأرغمت الشبان المسلمين علي تعلمها و غيرت عقائد الأطفال تارة بالقوة

وتارة بالحيلة .. لذا فقد جمع المسلمون كلمتهم وضموا صفوفهم لينالوا استقلالاً

حقيقياً

مفتتح

(سلوبودان - كارازديتش - توديمان)

مع دخول سلوبودان تبدأ المجموعة

دم .. دم .. دم غطي كل مكان

دم .. دم .. دم فاض علي الجبال

منك يا دنيا اختفت الألوان

وما عاد فيه غير الدم

سلوبودان يا جزار .. يا زعيم الصرب البتار

بنيت بطولتك علي اجساد النساء والأطفال

اسمك في كتب التاريخ جنب اسم الأشرار.

(يدخل كارازديتش)

وآدي كارازديتش الخاين للبوسنة

قائد لعصابات الغدر .. الشتينك الصربية

مليشيات الشتينك !!

قتلوا.. هبوا.. سرقوا.. حرقوا الأرض .. دفنوا مسلمي البوسنة احياء

جيش هولوكوا عاد والمسلمين نيام

جيش هولوكوا عاد وقطف كل الهامات

((اري رؤسا قد اينعت وحن قطافها))

(يدخل توديمان)

وآدي تالت الذئاب .. توديمان المغرور

زعيم الكروات .. استقل بكرواتيا وحررها

ودلوقتي جه ياخذ نصيبه من كعكة البوسنة

(المجموعة وهي تنسحب) عليه العوض ومنه الفرج

سلوبودان : ايه أخبار المذابح عندكم في البوسنة.. يا كارازديتش

كارازديتش : عال العال .. الولاد مش سايين شبر في البوسنة مادمهوش .. ولا ارض محروقهاش....

رافعين شعار (الارض المحروقة) اللي سيادتك اعلنتوا بحكمه عليهم

سلوبودان : والنساء والاطفال اوعي تكونوا بترحموهم

كارازديتش : اطمئن يا فنديم الاطفال بنخلص عليهم اول باول .. اما النساء فدول اللي هينجبوا لنا ابنا

صربيين [يضحكوا] ليهم نفس حقوق المسلمين في الارض

سلوبودان : (بلهجة انتصار) وبكده تختفى دولتهم ... عاوز دم ... لازم الدم يوصل من

عندك لحدود صربيا (يضحكوا بهستريا) اضحك يا توديمان ما بتضحكش ليه .. بعد قرون

من غزو الأتراك لبلادنا بنرد لهم الصاع صاعين .. اضحك يا توديمان تلاقي الشعب الكرواتي
كله بيضحك دلوقتي .. رغم الحروب اللي بينا لازم نستمتع واحنا بنشرب من دم مسلمي
البوسنة

كاراڤديتش : ايه رأيكم نطلع في رحلة صيد .. ناخذ النادق ونطلع مع الجيش نصطاد شوية بوسنيين
سلوبودان : (يضحك وهو يتخيل) يا سلام علي افكارك .. ايه رايك يا توديمان انا وانت معانا بنادق صيد
والأتراك بيجروا قدامنا زي الحيوانات .. منظر فظيع يهلك من الضحك

توديمان : واحنا ايه اللي حنكسبه لما نتعاون معاكم
سلوبودان : (بلهجة حازمة) انت عارف يا توديمان ان جيش الصرب هو وريث الجيش
اليوجوسلافي يعني قوتنا زي ماهية .. ودول اقليمية كبيرة بتساعدنا روسيا
والعرق السلافي كله ورانا .. يعني وقوفكم معانا هيحقق ليكم مصالحكم الوطنية

توديمان : زي

سلوبودان : انكم هتتجنبوا أي احتكاك مع قواتنا

توديمان : مش كفاية

سلوبودان : هنوافق علي استقلال كرواتيا بشكل نهائي

توديمان : برضه مش كفاية

سلوبودان : كل المزاي دي و مش كفاية

كاراڤديتش : (لسلوبودان) واضح ان السيد توديمان له مطالب في البوسنة .. يا زعيم

توديمان : مطالب مشروعة

سلوبودان : قول مطالبك

توديمان : احنا لينا شعب كرواتي في البوسنة وافتكرك ان البوسنة تقبل القسمة علي اثنين

سلوبودان : لا لا لا .. مش كفاية هنسيبكم تستقلوا ببلدكم

توديمان : يا سيد سلوبودان استقلالنا مش هبة منك .. احنا اقوي مما تتخيل .. رغم محاولتكم الخاوية

عشان تغتالوني لما قصتم القصر الرئاسي .. وعلي فكرة احنا برضه ورانا قوي اقليمية كبيرة قوي ..

وافتكرك ان وحدة الهدف بينا هتخفف الضغط الدولي عليكم .. قولت ايه

كاراڤديتش : (جانبا لسلوبودان) كلام معقول يا زعيم .. المناطق اللي تحت ايد الكروات في البوسنة من
الصعب السيطرة عليها عمليا .. ده غير ان دخول الكروات الحرب .. ه يظهر للعالم انها حرب اهلية لكن
وجودنا في الميدان وحدنا .. هيصعب الأمور

سلوبودان : موافق علي دخولكم الحرب في البوسنة .. في بعض الأماكن فقط وبشكل محدود ..

هيوحدده وزير دفاع دولتنا وزعيم صرب البوسنة كارازديتش مع الملحق العسكري لدولتكم

توديمان: في الحالة دي نشرب نخب اللحظة التاريخية دي

سلوبودان: بشرط تكون الكاسات مليانة بدم مسلمي البوسنة (يضحكوا)

توديمان: (لنفسه) حاسس اني واقف جنب دراكولا .. شيء مخيف

(لسلوبودان) الصرب والكروات اولاد عم

المجموعة: دم دم دم مايتلم

ناس بتصرف دولارات عل المزاج

وناس عيشتها غم وهم

اللوحة الاولى

المكان : منزل فاضل بمدينة روجاتسيا

الزمن : يوم الغزو

الديكور : (صالة المنزل ، بابان في العمق يؤديان الى حجرتين وسلم في المواجهة يؤدي للدور الثاني ، شباك في منتصف الحجرة تطل منه مئذنة جامع روجاتسا . اثاث فاخر ينم عن ثراء ، سجادة حمراء في وسط الصالة .. وبعض الفوتيهات ومنضدة صغيرة عليها تليفون . رف في الحائط فوقه راديو .
(اصوات رصاص ومدفعية .. تزداد وتنخفض طول العرض . فضيلة تصلى في خشوع . فاضل يتصفح الجريدة في اهتمام ، بينما تدخل هاما حاملة صنية الشاي تبدو عليها اثار الحمل . صوت انفجار على ، تقع الصينية من يدها وهي تصرخ .. يندفع فاضل نحوها للاطمئنان عليها

فاضل : هاما .. حصل حاجة

ماما : { مفزوعه } لا ... انا بخير ... بس الصينية وقعت مني

فاضل : ولا يهملك يا مرات ابني .. المهم سلامتك

هاما : اروح اجيب حاجة انشف الارض .. والم القزاز اللي اتكسر

فاضل : خليك مرتاحة .. انتي حامل والمجهود الكثير خطر عليك

هاما : طب اعمل شاي تاني

فاضل : اقعدى يا بنتي .. اقعدى ارتاحي (تجلس هاما . صمت) انا ملاحظ انك اليومين دول عقلك

شارد .. زى ما تكون فيه حاجة شاغلاك

فضيلة : { تنتهى صلاتها } فيه حاجه مزعلاك مننا يابنتي

هاما : { تبكى } بنتي

فضيلة : طبعاً بنتي ... مرات ابني تبقي بنتي وللا انتي عندك شك في كده

هاما : انا ما أستاهلش كلمة بنتي

فضيلة : ازاي تقولي كده .. طب ده انتي حبك في قلبي زي حب أولادي دينو ونورا وأكثر
(ترتمي في حضن فضيلة)

فاضل : حد يلاقى ناس بتحبه كده ويبكى

فضيلة : هو ابني دينو مزعلك

هاما : بالعكس ده حنين عليه قوي

فاضل : حد قالك كلمة زعلتك

هاما : كلكم أهلي واحن عليه من الأهل

فاضل : يبقى مافضلش غير أهلك (تبكي) هما اتصلوا بيكي

هاما : بيتصلوا بيه علي طول يهددوني .. اني لو ما بعدت عن دينو هيقتلوني انا وهو

هاما : لا بس كل ما افكر في اللي بيحصل حوالينا احس بالحزن والحجل منكم

فاضل : وانت ذنبك ايه

هاما : ديني ذنبي اني من الصرب واللى بيقتلوا فيكم بلا رحمة (صمت) المفروض انهم اهلي .

فاضل : لوته اصابت عقول الصرب ما عدوش بيشوفوا غير اطماعهم حتى انهم دنسوا

المقدسات وابدوا الاطفال والكبار . اغتصبوا النساء بقروا بطون الحوامل ... شئ فطيع .

لولا اني كبرت كنت مسكت سلاح وحاربت لكن للأسف بقيت اتحرك بالعافية

هاما : قدرك يابنى تتولد في جو كله كره وحقد

فاضل :ويمكن هو ده .. اللي يوحد المشاعر بين الصرب والمسلمين والكروات .. مين يعلم

فضيلة : { لفاضل { دينو .. ابني مفيش اخبار عنه في الجورنال

فاضل : { بعطف { تفتكرى انهم هيكتبوا اخبار ابنك في الجورنال { صمت { عموما ياستي هو كاتب

تحقيق عن مدينة يزروا

هاما : كاتب ايه

فاضل : كلام محزن ... الصرب اقتحموا القرية ليلة امبارح وابدوا سكانها عن اخرهم وهم

الآن على ابواب شيلدوفيتشى { بحزن { اقتربوا مننا كثير

هاما : مجرمين ... مفيش حد قادر يقف في وشهم { تدخل نورا {

فاضل : ادى صحفية المستقبل وصلت

نورا : { تبدو مهمومة { السلام عليكم { تتجه نورا ناحية الرايو) انتوا مش فاتحين الراديو ليه (تفتحه)

ص . الاذاعة : اصدر مجلس الامن اليوم قرارا يشجب فيه الاعمال العدوانية التي يقوم بها الصرب

تجاه شعب البوسنة الاعزل . كما قرر مجلس الامن حظر السلاح عن البوسنة
والهرسك ويبحث المجلس اليوم مشروع قرار قدمته الولايات المتحدة الامريكية
يقضى بالاعتراف بدولة البوسنة والهرسك وارسال قوات من الامم المتحدة
لحفظ السلام الى البوسنة والهرسك .

نورا : (باستنكار) حظر السلاح عن القاتل ممكن لكن عن الضحية كمان ده ظلم ...
ازاى يعاملوا الضحية نفس معاملة المجرم القاتل
فاضل : استنى يا بنتى خيلنا نسمع باقى الاخبار .

ص الاذاعة : والان اليكم كلمة الرئيس
ص الرئيس : ان رسالتى للبوسنيين الذى احسوا بخيبة امل اثر رفض الغرب التدخل هى
الشجاعة والايمان بالمستقبل لان الشعب الذى يقاتل من اجل البقاء لا يهزم ابدا .

فضيلة : { بحماس } ايوه .. محدش يقدر يهزمنا { بقلق } بس ابني خايفه يكون حصله مكروه
{ صمت } يارب سترك .

فاضل : انتى مش هامك غير ابنك ... والمئات من النساء والاطفال والشيخوخ اللى بيقتلوا كل يوم
دون ادنى رحمة او شفقة .. تحت سمع وبصر العالم { صمت } مش هامك امرهم { بجزن }
نورا : { بانفعال } حتى الدول الاسلامية مش حتعترف بنا حتى الان .. بالطبع منتظرين اعتراف
الدول العظمي بينا الاول .

فاضل : مش عارفين اننا خريزة فى العقد الاسلامى لو سقطنا هتكون البداية لسقوط باقى الدول الاسلامية

هاما : { بجزن } انا معدتش فاهمة حاجة .. حاسة ان الدنيا بتسود فى عيني (تتحدث كأنها فى حلم)
كنا امبارح بنلعب ونمرح مع بعض .. مسلم وصرى وكرواى .. نروح
المدرسة والجامعة ايدنا فى ايد بعض ... كان بيجمعنا الحب ... ايه اللى قلب
الدنيا كده ليه ماعدناش طايقين بعض { نورا } فاكره لما كنا فى كلية الاعلام
فى السنة الاولى واخوكى فى السنة النهائية

نورا : { بحماس } اول يوم شفت اخويا .. قولتى لى .. انا حاسة ان مصيرى ومصير اخوكى واحد
ورغم رفض اهلك لفكرة ارتباطهم .. الا انك اصريتى وقاومتى ونجحتى رغم

مقاطعة اهلك

هاما : وعمري ما حسيت بالندم بالعكس حب دينو وحبكم بيزيد في قلبي كل يوم عن اللي قبله .

فضيلة : { تنظر لبطن هاما } خلاص فاضل اسبوعين والطفل الجميل بيعي

نورا : وابقى انا عمه ... واتأمر على الولد

فاضل : ومين بقى اللي ح يسيبك تعملى كده (يضحكوا)

فضيلة : تفكر يا فاضل سبب الحرب دى ايه

فاضل : السبب

نورا : السبب

(اظلام تدريجي في المسرح . تركيز الاضاءة على فاضل ونورا)

فاضل : ده مشوار طويل

نورا : بدأت الازمة عام ١٠٥٤ ميلادية

فاضل : لما انقسمت الكنيسة الارثوذكسية والكاثوليكية

نورا : واعقبها مذابح بين الصرب اللي اعتنقوا المذهب الارثوذكسى والكروات اللي اعتنقوا

المذهب الكاثوليكي .

فاضل : في نفس الوقت ظهرت طائفة البوغميل (السعادة الالهية) تيار اصلاحى داخل الكنيسة

الارثوذكسية تختلف معها في القضايا الدينية والفلسفية .

نورا : البوسنيين اصحاب المذهب الدينى البوغميل ... ومن هنا نشأت الكراهية بينهم وبيننا

فاضل : حاول الامبراطور البيزنطى القضاء على الطائفة الجديدة .. خصوصا بعد ما اعتنق المذهب

الكثير من المسيحيين في جنوبا فرنسا .

نورا : وقامت مذابح ضدهم .. حيث قتل الامبراطور البيزنطى اكثر من ثلاثة ملايين انسان

وما تبقى منهم جاءوا واستوطنوا هنا في البوسنة .

فاضل : برغم صلابتهم ووقفهم بقوة ضد فرض اى مذهب دينى عليهم الا انهم فتحوا ابوابهم للاسلام

... ولما جه الاتراك للمنطقة وهزموا الصرب ولقوا البوسنة بفتح ابوابها لهم .. المفاجأة

الى كانت في انتظار الاتراك هى اسلام البوسنيين على يد اتجار المغاربة .

نورا : كان لتحطم الحلم الصربي على صخرة الاتراك والبوسنيين المسلمين اثر اصعب من انهم

ينسوه .. اثر ظل مترسب في نفوسهم تحت سفارات الوحدة التى حملها الاتحاد اليوجسلافى

سين .. وفشل وكان لازم تقوم الحربحرب تطهير مثل ما بيطلقوا عليها

{ اضاعة جوانب المسرح }

فضيلة : الشعوب ممكن تنسى لكنها مش ممكن تغفر

(صوت انفجار . تصرخ نورا .. تهدئها فضيلة . هاما ترسم علامة الصليب ..

فاضل يستطلع الامر من النافذة)

فضيلة : { بفزع } فيه ايه يا فاضل

(صوت عربات الاسعاف والمطافى . اصوات همهمات من الناس المتجهه لاستطلاع الامر)

فاضل : مش عارف .. كل اللى شايفة نيران مشتعلة بالمنازل المجاورة للجامع .. الظاهر

انهم كانوا قاصدين الجامع .. بس الحمد لله القذيفة اخطاها

نورا : معنى كده انهم قربوا من بيتنا

هاما : واياه العمل دلوقت

فاضل : العمل عمل ربنا

هاما : { بقلق } ياربى .. دينو اتاخر قوى

فضيلة : تفتكرى انهم اصابوه . والا { تكلم فيها بيدها }

هاما : لا دينو ح يرجع علشان ابنه اللى لازم يرج للنديا يلاقى ابوه قدامه

فاضل : { يفتح الاذاعة } استنوا يا جماعة

ص الاذاعة : بعد ان استولى الصرب على قرية يزروا .. سقطت منذ قليل قرية شيلد وفيتشى

تحت وطاة الضربات العنيفة للجيش الصربى المسلح باحداث العتاد والاسحلة وما

ص الإذاعة: زالت عمليات القتل والسلب والحرق مستمرة داخل القرية من ناحية اخرى

تحاصر قوات الصرب مدينة روجاتسيا .. استعداد لاجتياحها . { يغلق فاضل الراديو }

فاضل : هونوا عليكم .. واتذكروا الاية الكريمة { بسم الله الرحمن الرحيم " قل لن يصيبنا الا ما كتب الله

لنا . صدق الله العظيم } .. الجميع يصدق وراءه . صمت . يستمعون فى خشوع الى ابتهالات الشيخ

عصمت فى جامع روجاتسيا

المجموعة : يا رسول الله يانى .. يا رسول الله يا نبي

الامام : { يرد بصوت عذب } يا رسول الله يا نبي .. يا رسول الله يا نبي

المجموعة : يا رسول الله يا نبي

الإمام : يا نبى

الجموعة : { بصوت يبدأ فى الارتفاع تدريجيا } يا رسول الله يا نبى

الإمام : يا نبى

الجموعة : مشتاق لنور النبى والنبي مشتاق .. والنبي مشتاق

الإمام : مشتاق يا نبى

الجموعة : شفيعى يوم القيامة والشفيع فيه عزاء

الإمام : مشتاق يا نبى

الجموعة : طه محمد حبيى للقلوب ترياق .. للقلوب ترياق

الامام : مشتاق لنور النبى .. والنبي مشتاق .. والنبي مشتاق

الجموعة : يا رسول الله يا نبى .. يا رسول الله يا نبى

الامام : يا رسول الله يا نبى

الجموعة : يا رسول الله يا نبى

الامام : يا بنى يا نبى

الجموعة : اشوف حمام الحمى يبحوم فى كل مكان

الامام : مشتاق يا نبى

الجموعة : هو اللى يوم مولده فجر النبوة بان ... فجر النبوة بان

الامام : مشتاق لنور النبى ... والنبي مشتاق .. والنبي مشتاق

الجموعة : يا رسول .. يا

(ينقطع الصوت وسط انفجار مدوى واضواء مبهرة تبدو بجلاء من خلال الشباك
يضئ المسرح اضاءة متفاوتة بين القوة والخفوت يجرى جميع افراد الاسرة فى كل
مكان فى فزع وصراخ . تخفت النار تدريجيا ويضئ المسرح مرة اخرى هاما تقف
بجانب الشباك تستطلع الموقف . فضيلة مغمى عليها على احد المقاعد ونورا من وراء
احد المقاعد تهرع الى فضيلة

نورا : { بفزع } امى .. فوقى يا امى

(تسرع هاما الى احدى الحجرات وتاتى بكوب ماء. ترش نورا قليلا على وجه امها حتى

تفيق . فاضل يخرج لاستطلاع الامر . اصوات عربات الاسعاف)

فضيلة : { فى حالة هيستريا } ابنى ... ابنى .. هاتولى ابنى

هاما : ان شاء الله .. ح يرجع لنا بالسلامة

فضيلة : يارب ارفع مقتك وغضبك عنا .. يا كريم

فاضل : { يدخل وهو في حالة وجوم }

نورا : شفت ايه يا ولدى

فاضل : { بحزن } منظر فظيع .. حتى المقدسات ما سلمتش من ايديهم .. حولوا الجامع لاثر بعدين ..

اختفى كل اللي فيه

{ دقائق عنيفة على الباب .. الجميع في حالة ذعر }

نورا : امى انا خايفه يعتقلونا ويعذبونا .. ويبـ

{ لسانها يعجز عن الكلام }

فاضل : اهدى يا بنتى (تفتح الباب .. يدخل دينو مرتديا ملابس عسكرية) دينو

دينو : (بفرحة) والدى (يحتضنه .. يقبل الام ونورا . يمسك بيد هاما يتاملها باعجاب) هاما حبيبتي

... (تحضنه ويضع اذنه على بطنها . طمئني ابننا عامل ايه في الظروف الصعبة دى)

هاما : سعيد انه له اب بطل

دينو : مال وشك مخطوف كده ليه

هاما : من الخوف عليك (فاضل يحمم .. هاما تنجل) اسفه ياعمى اخذت دينو منكم

فاضل : لا خدوا راحتكم .. بس بعد ما نستفهم الاول عن اللي بيحصل حوالينا

فضيلة : { بلهفة } كنت فين يا ابني .. كده تقلقنا عليك

فاضل : امك من ساعة ما مشيت .. وهيه معيشانا في قلق عليك ..

نورا : وهاما كانت عاملة اضراب عن الاكل .

دينو : بقى انا غيabi سبب لكم القلق ده كله

فاضل : ارتاح الاول يا ابني الاول

دينو : ارتاح ازاي بعد المذابح اللي شفتها في شيلدوفيتشى .. شئ رهيب .. رهيب

نورا : احكى لنا كل حاجة شفتها

دينو : كنت باغطي احداث الحرب .. زى ما كلفتنا جريدة صوت البوسنة { صمت }

نورا : { بالحاح } كمل ...

دينو : اقتحمت قوات الشيتينك الصربية وهما يحرقوا البيوت ويقتلوا الاطفال .. وهما بيغتصبوا النساء

.. قتلوا ٤٠٠ طفل وامرأة ورجل قدام عيني ودفنوههم في مقبرة جماعية بدون رحمة او شفقة .. { هاما

تنسحب جانبا دون ان يدري بما احد {

فاضل : { مشير للملابس دينو { انت انضمت للجيش البوسنى

دينو : انضمت للفدائيين

فضيلة : { بلهفة { وحاربت

دينو : { بفخر { زى اى وطنى مخلص بيحارب

نورا : احكى لنا ازاي حاربت .. وازاي نفدت منهم بعد ما استولوا على القرية

دينو : حاربنا بكل حاجة وصلتها ايدينا .. انايب الغاز وبنادق الصيد .. وسكاكين ومطاوى وعصى

وحجارة .. { صمت { قاومنا رغم عدم تكافؤ القوة بينا وبينهم .. قاومنا رغم استشهاد كثير

مننا .. لكنهم ماتوا وابتسامة الرضى على وجوههم لانهم ادوا ادوارهم بكل بسالة ..

{ صمت { قدرنا نستغل ثغرة فى صفوفهم هربنا منها .. وجيت علشان اخدكم لمكان بعيد

عن هنا ..

نورا : { بقلق { هما قربوا كثير

دينو : قربوا .. بس انا عارف طريق مختصر نخرج منه لمكان امن

فاضل : { بسخط { جه اليوم اللى نسيب فيه بيتنا ونهرب زى الفيران المذعورة قدام شوية لصوص

فضيلة : ازاي نسيب البيت اللى اسسناه انا وانت طوبه طوبه .. البيت اللى ياما شفنا فيه لحظات

واوقات جميلة .. وجيراننا ازاي نعوضهم .. صعب ... حاسة لوسيينا البيت ح اموت

دينو : لو قعدنا ح نموت .. بس بعد ما يتلذذوا بتعذيبنا .. اشكال والوان .. ارجوكمى يا امى انا شفتهم

بيعملوا ايه فى الاسر اللى بياسروها .. ده حتى الاطفال مبيسلموش من ايدهم .. خرينا نسيب المكان ده

وخلى كل حاجة زى ما هية .

فاضل : جهزى ملابسنا وهاتى الفلوس والذهب .. الرحلة طويلة ومصاريقها كثير . مش ماعقوله

نسيبهم للاوغاد دول

فضيلة : { وهى تصعد السلم { تعالى معايا يا نورا نجهز حالنا .. حسبي الله ونعم الوكيل

دينو : { لهاما { واقفه بعيد ليه { صمت { الكلام خدنى ونسيت { هاما تبكى { وينسحب فاضل

خارجا .. مالك .. { صمت { مش اتفقنا ان دموعك غالية عليا ... ولا انتى ناوية ترعلينا .

هاما : ما اقدرش على زعلك

دينو : امال بتبكي ليه .. عاوزه ابننا يطلع كشرى { تبتسم هاما { الله .. اجمل ابتسامة

هاما : وحشتنى قوى { صمت { وكل ما افكر انى ممكن اتحرم منك فى اى لحظة باحس بتعاسة

دينو : ده اللى مزعلك

هاما : وهو البعد عنك شوية ... دا الموت بعينه

دينو : عشان كده لازم نهرب بجنا من وسط الجحيم ده { صمت } هوادىكم مكان امن

هاما : { متراجعه فى شك } هتودينا ... هو انت مش ح تكون معنا

دينو : { بجنان } انتى عارفه يا حبيبتى انى ضمن مجموعة من الفدائيين .. وما اقدرش

اتخلى

عنهم ولا عن الواجب المقدس

هاما : يعنى ح نفرق تانى

دينو : لازم نحرر الوطن .. لاجل ابننا يتولد حر ابن احرار

هاما : { فى شرود } وارجع اعد الساعات والدقائق والثوانى فى انتظارك

دينو : لازم نضحى

هاما : الانتظار مر { تحاول الجلوس بصعوبة } حاسة بجسمى بيتنقل

دينو : { يسندها } ارتاحى يا حبيبتى

{ يدخل فاضل وفضيلة ونورا }

دينو : فىن حاجاتكم

فاضل : احنا قررنا نفضل فى بيتنا

نورا : مش لازم نسيهم ياخدوا كل حاجة على الجاهز

فضيلة : لو كلنا هربنا يابنى .. هاتخفى دولتنا من الوجود

نورا : وهو ده اللى هما عاوزينه .. ارض بلا شعب

دينو : لكن وجودكم هنا .. هو الموت بعينية

فاضل : الموت ح يصيبنا فى كل مكان

نورا : يبقى نواجهه هنا

هاما : وانا معاكم

فاضل : { باشفاق } بس انتى حامل يا بنتى و ...

هاما : { مقاطعه } ابنى لازم يتولد فى بيته

دينو : انا فخور بىكم .. حى ليكم عمانى عن حاجات كثيرة .. فعلا مش لازم نتخلى عن اى

شبر من ارضنا .

الجميع : نقعد ونواجه

{ صمت . يجلسوا . اصوات الرصاص والانفجارات تقترب . فضيلة تمسك

بمصحف وتقرأ بصوت هامس . يقوم دينو يفتح الرايو {

ص الاذاعة : { جاءنا هذا النبا العاجل . اعترف مجلس الامن في ساعة متأخرة من صباح اليوم بجمهورية البوسنة والهرسك .. كما شجبت الاعمال الوحشية من جانب الصرب وطالبت جميع الاطراف بضبط

{ النفس

فاضل : الله اكبر

فضيلة : الحمد لله

نورا : اخيرا اعترفوا بدولتنا

فاضل : المهم يتدخلوا قبل ما قوات الصرب تبيد شعبنا

هاما : يارب يجعل السلم على ارضنا وبلدنا { ترسم علامة الصليب { ويعود الحب والوئام

الجميع : امين { اصوات خطوات اسفل المنزل .. واناس ييهمهمون {

فاضل : { لدينو { اقفل الراديو { لنورا { اطفى جميع الانوار .

{ الجميع : جالسون في حالة من الارتباك . ضوء ضعيف يكاد يبين وجوههم .

(صوت دقات قلوبهم)

صوت : انت اطلع من هنا ... وانت خليك هنا .. وانتو تعالوا معايا

صوت اخر : تفكر ان ده البيت اللي جات لينا معلومات عن وجود اربابي عندهم

الصوت الاول : هو بعينه .. وبعدين هو مش هو .. لازم نفتشه علشان نحصى الغنائم

{ خبطات عنيفة على الباب .. رعب يسيطر على الاسرة {

صوت : { زاعقا { اكسر الباب { يفتح الباب تحت وطاة الضربات { يدخل الجنود يتقدمهم ضابط

يبدو عليه العصبية والقسوة . يضئ الجنود النور . يقف افراد الاسرة .

الضابط : { بسخرية { يعنى انتوا موجودين في البيت .. طب مش لما يجي ضيوف عندكم يخطوا على

الباب تفتحوا لهم .. كنتوا فاكرين اننا ح نزهق ونمشى ها ... ها .. ها

الضابط : { الجنود يضحكون { يظهر احنا هنتقل عليكم شوية

{ يجلس على احد المقاعد في يده اوراق يتصفحها .. يعلق احد الجنود صورة سلوبودان مليوفتش

وعلم صربيا وصورة كارادويتش زعيم صرب البوسنة . باقي الجنود يصوبون اسلحتهم نحو

اسرة فاضل . الضابط يتصفح الاوراق فى يده باهتمام {

الضابط : انت بقى دينو .. { صمت } الارهابى

دينو : اللى بيدافع عن وطنه ما يبقاش ارهابى

الضابط : وكمان بتعالى صوتك

{ يضرب احد الجنود دينو بمؤخرة البندقية . يتالم دينو {

الجندى : الزم ادبك يا حمار

الضابط : { ينظر لنورا بشهوة { القمورة ده اختك

فاضل : دى ملهاس ذنب . لو فى حاجه حاسبنى انا عليها

الضابط : ما هو انت لو كنت راجل .. كنت بعدت ابنك من الاول عن سكة الارهابيين ..

شوية العيال دول اللى فاكرين انهم ممكن يهزموا قوات الشتيك بكل قوتها

وجبروتها فاكرين انهم يقدروا يقفوا قدام مشروع صربيا الكبرى ها ها { الجنود يضحكون {

الضابط : انتوا بتحلموا

فاضل : واياه المطلوب مننا

الضابط : احنا عاوزين ابنك يتعاون معنا .. اذا كان عاوز ليكم الخير

دينو : { مسترييا { اتعاون ازاى .. اذا كنتم تقصدوا انى ابلغ عن زملائى ... فده مستحيل

الضابط : { يتفرس وجه دينو . يقرأ الملف الموجود فى يده { الاسم : دينو ..

السن : خمس وعشرون عاما ..

الزوجة : هاما صربية -

المهنة : صحفى

دينو : واضح ان حضرتك عنك معلومات كتيرة عني

الضابط : { يضيف { ارهابى عضو فى خلية ارهابية هدفها القضاء على الشعب الصربى

دينو : انا مش ارهابى

الضابط : { يغلق الملف . لدينو { انت شاب شجاع وذكى . فى ايدك انقاذ اسرتك اذا أردت ..

دينو : انقذ أسرتي ازاى

الضابط : بسيطة .. ساعدنا نساعدك

دينو : مستعد اساعدكم بس بشرط

الضابط : { بسخرية { شرط .. قول يا سيدى قول شرطك

دينو : اسرتى ترحل الاول بسلام وبعدها

الضابط : { مقاطعا } ح يحصل .. بس فى الوقت اللي احنا نشوفه مناسب

دينو : امتى

الضابط : لما تجاوبنى على بعض الاسئلة البسيطة { مؤكدا بصراحة } .. ساعتها اسبيك ترحل
لاى مكان تحبه انت واسرتك .. او تبقى معنا كمواطن صالح . نراك ونحميك .. غير
المكافاة اللي ح تاخذها

الضابط : { بود } اجلسوا الاول .. اولاً عاوزك تعرف حدود قوتنا .. احنا نملك اكبر جيش فى اوروبا
.. وانت عارف ان القوى دايماً يفرض كلمته على الضعيف يعنى مافيش دولة هتمد ليكم يد العون

..

دينو : الأمم المتحدة

الضابط : (مقاطعا) سبيك من الكلام الفاضى والثرثرة اللي بتحصل فى الامم المتحدة .. كل ده تمثيل
.. يعنى اعترافهم بدولة البوسنة والهرسك مش معناه انكم ح تحكموها .. فاهمنى طبعاً .. من ناحية ثانية
الحرب ح نكسبها ... ح نكسبها .. وشوية الارهابيين اللي بيسموا نفسهم وطنيين ح نفعصهم زى
الحشرات .. خليك ذكى واتعاون معنا .. { صمت } طبعاً انت عارف مكان الخلية الارهابية اللي كنت
منضم ليها

دينو : { بغضب } احنا مش ارهابيين

الضابط : احنا .. بتعتبر نفسك جزء منهم جميل { صمت } وعموما نعدل الجملة .. رجالكم الشجعان ..
قولى بقى موجودين فى

نورا : { محذرة } متقولش يا دينو

(يضربها عسكرى بمؤخرة سلاحه . تسقط مغشيا عليها . فاضل يحاول الدفاع عنها)

يتراجع امام فوهات البنادق المصوبة اليه)

فضيلة : { تحاول افاقتها } هيه بنتى تستحمل الضرب ده كله... منكم لله

الضابط : { لدينو } وصلنا لحد فى

هاما : { لدينو } اوعى تبيع وطنك وتقول لهم حاجة

الضابط : { زاجرا } .. اخرسى .. انا ممكن احاكمك بتهمة الخيانة العظمى

هاما : { بسخرية } خيانة عظمى لمن ... لقتلة وسفاكين دماء زيكم

{ الجنود الصرب يتزلوا السلاح ويتنبهون لكلام هاما }

الضابط : { محذرا } اننى كده بتعيبى فى النظام .. وبتهاجى سياسة دولتنا

هاما : بكرة يجى اليوم اللى الشعب الصربى يكتشف فيه حقيقتكم ويحاكمكم على جرايمكم فى حق البلد .. وحق الدين المسيحى اللى لوثتوه بافعالكم الحقيرة ضد شعب اعزل مسالم

الضابط : احذرى الفيض كال بيا .. ولولا انك صربيه كنت خليت الجنود

هاما : { مقاطعة } يقتلونى ما انتو قتلتموا احلام الشعب كله .. يغتصبونى ما انتو اغتصبتموا حق

الغير فى الحياة .. وحق شعبنا فى العيش بسلام

الضابط : { يصفق بسخرية } شئ مؤثر جدا { للجنود } مش كده (الجنود ما زالو منتبهين . زاعقا)

انتباه .. فيه ايه .. ارفعوا سلاحكم يا اغبياء { لدينو } طبعاً انت اعقل من انك تسمع لكلامهم

{ صمت } انت عارف تعاونك مش بس ح ينقذ اسرتك .. ده ح يقلل من

خسائرهم للارواح لاننا بعدما نقض على الارهابيين ح نصدر عفو عنكم

فاضل : { ساخرا } عفو بعد ما قتلوا الالاف من شعبنا البرئ بعد ما حرقوا القرى جاي

تتكلم عن العفو

الضابط : { بعنف } اخرس .. مش عاوز صوت هنا يعلى على صوتى .. انا بس اللى اتكلم هنا

{ زاعقا } ميكولا (يدخل جندى نحيف . يخرج الضابط سيجارة) انا ح اعرف ازاي

اربيكم

الضابط : ميكولا { يسقط ميكولا على الارض } قوم يا مصيبة

ميكولا : نعم يا سيدى { ينظر لقدمه } اسف يا سيدى ما رفعتش الشراب .. اصلهم ما لاقوش

شراب على مقاسى فى الجيش ... تصور بيقلولوا رجلى نحيفة { يضحك }

الضابط : { متبرما } انت ح تحكى لى قصة حياتك

ميكولا : { ببلاهة } متفكر نيش بقصة حياتى .. انت عارف

الضابط : (مقاطعة) اخرس يا غبى اخطر حاجة عملتها قوات الشتيك اعتمادها على حثالة الشعب

الصربى .. من الاصلاحات والسجون والعاطلين عن العمل .. حثالة { لميكولا } شايف

الراجل ده (يشير لفاضل) خده بره لحد ما اقولك هنعمل فيه ايه

ميكولا : حاضر يا سيدى .. { يتجه نحو فاضيلة } يمسك بذراعها يللا بينا

فاضيلة : (تترع زراعها) سيبنى يا غبى

الضابط : بتعمل ايه يا مصيبة

ميكولا : باخد الراجل ده .. حسب الاوامر

الضابط : دى ست .. يا حمار الراجل اهوه قدامك

ميكولا : { يتامل فضيلة } دى ست ها ها ... جميلة وجسمها بيشح حرارة تدفى .. ممكن اخدها

بدل الراجل .. اديهاى شوية

الضابط : نفذ الاوامر يا غبى .. والبس نضارتك لحسن تودينا فى داهية

ميكولا : سقطت منى فى الحرب

الضابط : غور من وشى وخليهم يعملوا ليك نضاره

ميكولا : (يتحرك بمفرده) راجل عظيم قلبه طيب

الضابط : استنى يا غبى رايح فين

ميكولا : افصل نضارة

الضابط : بعدين .. دلوقتى خد الراجل ده معاك .. ومتورنيش وشك تانى

ميكولا : (ياخذ فاضل . لنفسه وهو خارج) راجل غبى قاسى ..

(تحاول نورا منعهم . احد الجنود يدفعها فتسقط على الارض)

نورا : انتو ناوين تعملوا ايه فى بابا

الضابط : ماتخافيش ... لو تعاونتوا معانا ح يرجعه لكم .. والا

دينو : هنتعاون ..

الضابط : { بجث } مش عارف انت واخذ الموضوع بحساسية ليه .. دى معلومات بسيطة .. يعنى مثلا

زى ما قولت من شوية مكان الخلية اللى بتعمل معاها فى ... مصادر تسليحكم .. ازاي بتحصلوا عليها ..

استلة سهلة تجاوب عليها تاخذ صك الحرية وترحم امك واختك ومراتك ووالدك المسن من البهدة ..

فاهمنى طبعاً ..

فضيلة : لا يا دينو اوعى تخون وطنك { دينو ذاهلا ينظر حولة حائرا }

الضابط : لو رفضت امك واختك ومراتك ح نقدمهم طعام شهى لجنودنا

نورا : احنا ممكن نتحمل اى عذاب الا عذاب الخيانة

الضابط : فكر بايجابية اقولك انا هاساعدك فى التفكير (ينادى ميكولا)

ميكولا : { يدخل يتعثر فى بنطلونه } اسف يا سيدى البنطلون الملعون طويل .. وبيتعمد يوقعنى .. بس

ح اقصه

الضابط : هات الراجل اللى بره { ميكولا يخرج ويأتى بفاضل بسرعة بشكل مسرحى } الخبرة علمتنى

ان لما صديق زيك يتعثر فى التفكير .. اساعده بانى { يطلق الرصاص على فاضل } اقتل

اقرب شخص ليه

جندى : تنشين هائل

(نورا تحاول الوصول لابيها . يمنعها الجنود . فضيلة تصرخ وهاما تبكى ودينو واجها)

نورا : مجرمين .. اندال .. والدى .. قتلوه غدر الكلاب

ميكولا : { بتاثر } قتلت الراجل ده ليه

الضابط : قتلته زى ما قلت قبل كده وزى ما هتقتل بعد كده .. عشان نظهر الارض منهم

جندى : { بفرحه } باحب منظر الحبث وخصوصا اذا كانوا مسلمين

الضابط : { لميكولا } الاسرى عبي علينا . محتاجين ياكلوا ويشربوا وليهم حقوق .. وجع دماغ

وانت عارف انا باكره اسر الرجال .. لكن الستات اه

جندى : علشان الترفيه

الضابط : { ينظر لجثته فاضل } منظر هائل .. الموت بيدى شكل ملائكى للانسان .. { لميكولا }

بص شكله زى الاطفال

ميكولا : { لنفسه } انت وغد .. انا مصمم دلوقتى اكثر من الاول انى ما استعملش السلاح تانى فى قتل

حد

الضابط : { يخاطب الجنود } يا حراس احلام الصرب .. اعرفوا ان كل ما تقتلوا اكثر تصعدوا

فى المناصب العليا لجيشنا بسرعة { لدينو } وانت ح اسبيك

دقيقة تفكر وبعدها ح ينفذ صبرى (للجنود) خدوا الجثة دى بره

جندى : بس المقبرة اللى عملناها اتملت عن اخرها

الضابط : اعملوا واحدة تانية وتكون دى (يشير لجثة فاضل) أول ضيوفها { يخرجوا الجثة }

فضيلة : { لدينو } اوعى تتعاون معاهم .. دول مالموش عهود

هاما : متصدقش كلامهم

نورا : دم ابوك هيبقى راح هدر .. لو اتكلمت

دينو : (مقاطعا) قتل والدى بداية بس .. ما تعرفيش ممكن يعملوا فيك ايه وفى اختى ومراتى

دول ماعندهم ضمير

هاما : وحالنا مش ح يتغير بتعاونك معاهم ... ادبك شفت اسهل حاجة انهم يقتلوا

دينو : { لنفسه } يبقى مفيش غير انى احاول الهرب فى اول فرصة . لان ضغوطهم على

مش هاتنتهى ويمكن اسلم اسماء زملائى ليهم .. فى لحظة ضعف

الضابط : { لدينو } وقت المناقشة انتهى هتعاون معنا وللا

دينو : دلوقتي بس.. انا مصر على عدم التعاون مع قتلة زيكم

الضابط : { ميكولا } فتش الارهابي ده ذاتيا

ميكولا : { باستغراب } ايه..

الضابط : فتشوا تفتيش ذاتي

ميكولا : { يدور حول دينو باستغراب .. ينظر للضابط ويهز كتفه } مش فاهم

الضابط : فتشوا { ميكولا يفتش دينو . يجد ورقة }

ميكولا : وجدتها وجدتها

الضابط : ومستنى ايه اقراها

ميكولا : { ميسك الورقة ويقلبها في حيرة } فين الكتابة

الضابط : { ياخذ الورقة } كل الكتابة دى مش عجبك { يقرأ الورقة بمهمه غير مفهومة } ده اللى كنا

عاوزينه { ينادى } ايفانوفش

ايفانوفيش : { يدخل } نعم يا سيدى

الضابط : فتش الشقة .. واى شئ تلاقيه هاته بسرعه قبل ما تحرق البيت .

ايفانوفيش : حاضر يا سيدى

الضابط : تحرك يا غبي.. فتش الشقة

ايفانوفيش : اى شقة .. دى فيلا

الضابط : فتش الفيلا ... مش عارف اتحدفتوا علي من اى مصيبة

ايفانوفيش : من السجن يا سيدى

ميكولا : اتكلم عن نفسك انا جيت من الاصلاحية

الضابط : { يصرخ } اتحركوا { يصعد ايفانوفيش ومعه جنديان السلم . بينما يفتش اخر باقى

حجرات المنزل بالدور الاول . زلاتكو بيصوب سلاحه ناحية الجندى { انت يا

مصيبة موجه سلاحك ناحية مين

زلانكو : ناحية الارهابي { ينظر في اتجاه السلاح . ينجل } اسف يا سيدى

الضابط : اوه انجدينى يارب { لميكولا } خذ البنت وامها والعروسة دى { يبشير لهما } تحت

ح ناخذهم معنا معسكر سرينا .. جنرال ماكترى هيزور المعسكر اليوم .. ولازم

نقدم له حاجه جديدة تفتح النفس .. وتسد بقه

دينو : { مندهشا } جنرال ماكترى .. قائد قوات الامم المتحدة

الضابط : ايوه .. فيه اعتراض

دينو : انت كداب

الضابط : { بسخرية } اختك حتروح هناك وتقولك { يضحك } طبعا في الاخرة .. او في الجحيم

(ميكولا وزلاتكو يحاولان انتزاع نورا وهاما لكنهما يقاومان)

دينو : { يركع تحت قدم الضابط } ارجوك اقتلهم اذبحهم .. بس بلاش معسكرات الاعتقال

الضابط : ممكن نغفو عنكم بشرط تتركوا دينكم الابله .. وتدخلوا في ديننا

دينو : مش ممكن نتخلي عن ديننا

الضابط : كنت متوقع ردك .. ولك ردى .. ميكولا { اقتل الولد ده .. متراجعا } بلاش انت لحسن

تقتلنى..... زلاتكو اقتل الولد ده

(زلاتكو يصوب سلاحه لدينو . هاما تقف مواجهة السلاح لحماية دينو تصيها الرصاصة تسقط

في حضن دينو)

دينو : ايه اللي عملتيه { يتزل ايفانوفيش والجنود محملين بالحقائب }

هاما : دى اسعد لحظة في حياتى . انى فديتك بروحى يا اغلى من الحياة

دينو : هان عليكى تسبيني لوحدى

هاما : انا باسيبك لقضية اعظم واهم منى .. وطنك .. مكانك هناك مع جيش التحرير { تموت . ييكى }

الضابط : { لزلاتكو } برافو ... بتنشن كويس

زلاتكو : كتر القتل علمنا التنشين

(صوت انفجار يحدث ارتباك . يهرب دينو من شبك المنزل . يطلق الضابط الرصاص عليه

دون جدوى يخرج في اثره زلاتكو وميكولا)

الضابط : { من الشباك للجنود بالخارج } امسكوا الولد ده اقتلوه ... انا ح اعرف ازاى

الضابط : (يدخل ميكولا) مسكتوه ينظر ميكولا للارض . رد ياغبى

ميكولا : هرب يا سيدى .. الولد ده سريع جدا .. عمرى ما شفت حد بيجرى زيه ورغم انى

(يدخل زلاتكو) مسكته الا انه هرب وقالى ياغبى وجرى

زلاتكو : اللي مسكته ده يبقى انا ياغبى .. يا فندم الانفجار اللي سببته المقاومه هو السبب

الضابط : يعنى هرب وسطكم يا اغبياء .. هاتوا اسرته وتعالوا ورايا... احرقوا البيت باللى فيه..

مش عاوز حاجه تفكرنى باليوم الاسود اللي دخلته فيه

زلاتكو : احلى امر باسمعه من قائدنا
 ايفانوفيش : انا اللي عليه الدور اولع فى البيت
 زلاتكو : لا انا
 ايفانوفيش : لا انا
 (يتجادلان بينما يظلم المسرح)
 اظ_____لام

اللوحة الثانية

المكان : احد المغارات فى جبال مدينة روجاتسيا
 ديكور : مغارة واسعة لا شئ داخلها سوى مساطب قليلة مفروشة بمفارش بسيطة وشموع تنير المكان ...
 خريطة كبيرة معلقة على الحائط .. ومدخل فى المواجهة للجمهور ومدخلين جانبيين لحجرتين .. صورة على
 عزت بيجوفيتش معلقة بجوار الخريطة .
 (راجى احد رجال المقاومة يرقد على احد المساطب وبجواره الراديو يقلب فيه .. والسلاح
 بجوار الحائط .. بينما عامر ينظف سلاحه .. تبدو على عامر اثار المرض)
 صوت الراديو : اتخذ مجلس الامن قرار بعمل مناطق متروعة السلاح .. تحت اشراف الامم المتحدة ..
 من ناحية اخرى اودى قصف المدفعية لاحد اسواق بسرايفوا يودى بحياة اربع وعشرون فردا
 راجى : { يغلق الراديو } مسيرنا نحرك يا بوسنا ... مسيرنا نروى ارضك من دم اعدائك
 عامر : { مسترينا } ازاي وهما كل يوم بيكسوا ارض جديدة ويزيدوا قوة واحنا بتزيد ضعف
 راجى : خليك واثق فى عدالة ربنا .. وفى ارادتنا .
 عامر : نفسى اعرف الامم المتحدة موقفهم مننا ايه بالضبط .. وايه اللي تقصدها بالمحميات دى
 راجى : عاوزين يفرضوا الامر الواقع علينا .. بحجة حمايتنا .
 عامر : عاوزين يحطونا زى الفراخ جوه اقفاص وساعتها نقبل بقراراتهم الظالمه او نواجه خطر
 الابدادة من الصرب .
 راجى : خطة قدرة (يدخل شاكر مبتسما) اول مرة اشوفك مبتسم من اول الحرب
 شاكر : جاى ومعايا ضيف قصدى صديق منتظرينه كلنا .
 راجى وعامر : { معا } دينو { يدخل دينو يعانقانه }

عامر : اجمل مفاجاة لنا

راجى : سعيد بعودتك يا بطل

عامر : وعرفت تنفذ منهم ازاي

شاكر : خليه ياخذ نفسه الاول الراجل له ثلاث ايام يهرب من مكان لمكان وعاوز يرتاح
دينو : الراحة ح تيجى منين والاب والزوجة اتقتلوا والام والاخت اتاسروا .. ويا عالم مصيرهم ايه
شاكر : مش انت بس اللي خسرت ناس بتحبهم .. كل بيت بوسنى خسر اب وام واولاد..

ارفع راسك وحط ايدك فى ايدنا وتعالى نحارب وندافع عن وطننا
دينو : انا كنت انانى فى احزاني .. وادى ايدى ممدوده اهيه { يسقط مغمى عليه }

شاكر : سبوه يرتاح

(وينقله عامر وراجى على احدى المصاطب)

عامر : باين عليه قاسى كتير .. اليومين اللي فاتوا

شاكر : الكل بيعانى { لراجى } هم الاخوات اللي لاقيناهم فى الجبال مستخبين اخبارهم ايه
راجى : حالتهم النفسية عاليه جدا .. وطلبوا تجنيدهم معانا

عامر : نضمهم لزميلاتهم المقاتلات

شاكر : بعد ما تتأكد من مدى اقتناعهم باشتراكهم فى الحرب .. ويكون بارادتهم

عامر : طبعاً .. طبعاً

راجى : { مداعبا } بعد كده هنعلمهم فرقة لوحدهم { يضحكوا }

شاكر : تعالوا نخطط لعمليتنا الجديدة .. ونسيب دينو ينام

(يدخلوا جهة جانبية . اضاءة خافته بالمكان . دينو يتقلب فى نومه .. يظهر اسرة دينو)

دينو : والدى .. امى .. هاما .. نورا .. انتوا لسه عايشين .. بخير .. اكيد ده حلم .

فاضل : كده برضه يابنى قهرت وتتخلى عن اهلك

دينو : غصب عنى يا والدى .. وجودى مكمنش ح يفدهم .. بالعكس يمكن كنت ضعفت

ويوحت باسرار رجال .. بيفدوا بارواحهم وطنهم

فضيلة : دينو انت بطل .. وانا فخورة بيك

نورا : انقذنا يا دينو .. انا وامك محتاجين ليك

هاما : دينو ابنك بيرفسنى ... الله حتى اسمع { يضع اذنه على بطنها } باين عليه ولد

دينو : { يعصر راسه بايده } يارب مين يقدر يتحمل العذاب ده .. يارب الدم لوث ارضك .. والظلم

بلغ مداه .. وجيوش المسلمين تايهة في ظلام الخلافات ومعادش فيه معتصم ولا صلاح الدين يوحدنا }

صارخا { ايدكم فى ايدنا يامسلمين.. الطوفان هيقضى على الكل واسلاماه .. واسلاماه
(اضاءه خافته . دينو نائم وهو يردد واسلاماه . وتاتي حسناء حاملة كوب ماء. توقطة)
حسناء : يا اخ دينو قوم ... { يقوم مفزوعا } استغفر الله ... الظاهر انه كابوس
دينو : ينظر اليها فى استغراب انا حسناء اخت مجاهدة .. انضميت للمقاومة جديد { يتناول كوب الماء }
انت عارف انا كل ما يجيني كابوس اقوم اصلى ركعتين لله .. ارتاح واجدد نشاطى بالتدريبات
العسكرية .

دينو : ازعجتكم

حسناء : لا ابدا.. انا من كتر ما سمعت عنك من الزملاء قررت اتعرف عليك { صمت } واضح انك
عانيت كثير .. بتبص لى كده ليه .

دينو : اصلك جميلة قوى { مستدركا } اسف لجراتى .. بس

حسناء : { مقاطعة } ولا يهملك .. انا دايماسمع الوصف ده .. لحد ما بقى عادى بالنسبة لى
{ مبتسمة } يمكن كنت زعلت لو لاحظتتش جمالى
دينو : فين باقى الزملاء ..

حسناء : اللى بيتدرب بره { بهمس } والقواد جوه بيخططوا للعملية الجديدة

دينو : وانت بتشاركى فى العمليات اللى بيقيموا بيها

حسناء : واضح انك شايف انى جميلة وبس .. انا شاركت فى عملية واحدة بس .. لحد دلوقتى .. ودى
كانت فى روجاتسيا مدينتك { بيدو الحزن على دينو } .. اسفه انى دوست على الجرح بتاعك
دينو : الجرح مفتوح و ح يفضل يتزف لحد ما ارد اعتبارى

حسناء : ماتخليش الانتقام هو هدفك الاساسى .. والا ح يعميك عن قضيتنا الرئيسية وهى الدفاع عن
الوطن

دينو : غصب عنى .. الجرح كبير قوى .

حسناء : اتعلم تعيش مع جرحك .. وحاول تشوف حاجة كويسه فى وسط الضباب والهلاك اللى
بيواجهنا .

دينو : { يبتسم بمرارة } حاجة كويسة

حسناء : ايوه .. انا مثلا شايفة ان اللى بيحصل لينا .. كان السبب فى تقوية اسلامنا .. وان

الحرب دى ابتلاء من ربنا بيختبر بيه صدق عقيدتنا

دينو : { باعجاب } انتى مين

حسناء : قلت لك .. حسناء

{ يدخل شاكر وعامر وراجي }

شاكر : { لدينو } اتعرفت على حسناء .. جميلة الجميلات

عامر : وهية البطلة اللي فجرت مخزن الزخيرة في روجاتسيا قرب بيتكم

دينو : مخزن الزخيرة ده هو اللي انقذني

راجي : ازاي

دينو : لان الجنود انشغلوا في الانفجار .. وبكده قدرت اهرب منهم

حسناء : يعني

عامر : انتو اتعرفتوا ببعض قبل ما تشوفوا بعض { بيضحكوا }

شاكر : نظرا لبطولة حسناء .. بقينا بعمد عليها في اصعب العمليات

حسناء : دى ثقة غالية يا فندم

شاكر : اننى تستاهلى يابطلتنا .. ودلوقتي ح نديك يا دينو انت وحسناء فكرة عن عمليتنا

الى ح نقوم بيها .. طبعا عارفين المنطقة { يشير للخريطة } اللي بيتمركز فيها

عدونا وسط الاشجار وناصبين مدافعهم على الجبال في مواجهة مدينة سريبتنا ..

استعدوا لغزوها

دينو : مش الامم المتحدة اعلنتها متزوعة السلاح

شاكر : الصرب .. ما بيعتروموش اتفاقيات دولية .. في المنطقة دى { يشير لمكانها على الخريطة }

فيه مخزن ذخيرة واسلحة .. احنا ح نستغل نشوة فرحتهم بالنصر في روجاتسيا واحتفالتهم

الليلة دى .. و ح نفاجأهم بقوة من ست الى ثمانى افراد . ح يكون معايا راجي في القيادة

عامر : وانا

حسناء : وانا

دينو : وانا

شاكر : على مهلكم يا جماعة .. لو رحنا كلنا في عملية واحدة .. ولا قدر الله فشلنا واستشهدنا

... مين اللي ح يقود مجموعتنا .. انتوا ح تفضلوا هنا وعامر القائد في غيابي .. تدرب

المجموعة وتحضرها وتجهزها لاي عملية جديدة ومعاك دينو وحسناء ح يساعدوك .

عامر : العملية ح تستغرق قدايه

شاكر : ربنا وحده يعلم بس اذا ماجيناش في خلال ساعة خطط للعملية الجديدة بمعرفتكم ..

وربنا يوفقكم { لراجي } يللا بينا

دينو : خد بالك من نفسك

شاكر : " وما تدري نفس باى ارض تموت .. صدق الله العظيم "

{ يخرج راجي وشاكر }

حسنا : لما اخراج اقم على زملائنا اللي بيتدربوا بره { تخرج }

عامر : { لدينو } كنت عاوز اقولك سر بس توعدنى الاول ما تجيش سيرة لحد

دينو : اوعدك { صمت } سر ايه .. ما تقول يا عامر

عامر : انا مريض من فترة (ينظر حوله) عندى تليف فى الكبد

دينو : (بيندهش) ايه .. انا كنت حاسس بكده ومكذب عيني .. حد من الزملاء عرف

عامر : باقولك سر .. ولو حد عرف من زملائنا بحقيقة مرضي .. هيستبعدوني من المقاومة ..

حاجة زى دى لو حصلت انا ممكن اموت قبل ميعادى .

دينو : اللي انت بتعمله فيه خطر على حياتك .. انت كده بتنتحر

عامر : حياتي ماهاش لازمة .. ووطنى محتل

دينو : انت محتاج لراحة والاجهود خطر عليك .. انت

عامر : (مقاطعا) اسمع يا دينو انا شاركتك سري مش عشان تدور ليه على حل .. وللا تقولى

على اللي اعمله

دينو : انا خايف عليك

عامر : مش عاوز احس بالندم لاني حكيت لك علي سري

دينو : ما تخافش شرك ها حافظ عليه انا باقولك كده علشان (يخرج عامر مظروف)

عامر : خد خلي ده معاك

دينو : ايه ده (يتفحص المظروف) مش فاهم

عامر : دي وصية .. لو جرا ليه اي حاجة اديها لابني

دينو : بس انت مش كاتب العنوان

عامر : مدينة سريينيتسا ..

دينو : دي مدينة كبيرة .. فين هناك

عامر : (حائرا) ما اعرفش

دينو : ما تعرفش ساكن فين

عامر: كل اللي اعرفه إن أمه أخذته في بداية الحرب هناك

دينو : ما اتصلوش بيك او اتصلت بيهم

عامر : ما انت عارف لن الصرب حولوا مدننا لكانتونات معزولة عن بعضها

دينو : (مطمئنا) بكره الازمة تنفرج وتقابل ابنك وزوجتك

عامر: اليوم ده بعيد .. ارجوك اوعدي تدور عليهم وتوصل وصيتي لابني

دينو : اوعدك

عامر :فيه موضوع تاني بيهدد مسار المقاومة ومستقبلها

دينو : خطر ايه

عامر : انت عارف ان مقاومتنا ذاتية نابعة من ابناء الشعب البوسني

دينو : تقصد ايه

عامر : المقاتلين العرب

عامر : انا شايف ايهم خطر علينا

دينو : دول ناس سابوا بلادهم واهاليهم وجم يساندونا في حربنا ضد طاعون العصر سلوبودان

عامر : بس افكارهم عن الجهاد خطر علينا .. ومحاولتهم السيطرة علي المقاومة البوسنية

دينو : وما بلغت شاكرك بمخاوفك ليه

عامر : حاولت وضح له خطورة الامر .. رفض يسمعي .. ده كمان وافق علي تشكيلهم

فرقة مقاتلة لوحدهم .. تعمل بدون تنسيق مع المقاومة الوطنية .. تخيل الكارثة في

المستقبل في حالة ما كانت هناك تسويات سياسية

دينو : الحقيقة أنا مكنتش شايف الموضوع من الزاوية دي .. واضح ان صوت الرصاص

بيعطل كتير من الحواس

عامر : لازم نناقش مستقبل المقاومة .. قبل ما يتغير ميارها وتصبح عبأ علي شعبنا

بدل من دعمها له

دينو : لما يجي شاكرك اوعدك نشوف حل للموضوع الخطير ده (يستمع) انا سامع صوت حد جاي

(حسناء تدخل ومعها مجموعة من الفتيات والفتيان يبدو عليهم اثار السهر والجوع والخوف)

عامر : اكيد دول اهل روجاتسيا .. بلدياتك يا دينو

دينو : هما بشحمهم ولحمهم .. (لحسنا) كانوا فين

حسنا : { لدينو } كانوا مستخبين في الغابات اسبوع كامل لحد ما عثرنا عليهم بالصدفة

وعاوزين ينضموا لينا ،

عامر : اهلا يا ابطال

دينو : انتوا بين اهلكوا واخواتكم .. حد فيكم يعرف حاجة عن مصير أسرتي

فتى : عندكم أكل

فتاة : اصلنا جعانيين لينا ايام .. تعبنا من عدها .. بناكل ورق الشجر وبنشرب لا مؤاخذه

فتى : { مبررا } احسن من الموت

عامر : خلوا التفاصيل دى بعدين .. انتو ح تروحوا مع اختكم حسناء .. ح توفر ليكم كل حاجة

عاوزينها

حسناء : { برقة } يللا بينا { يخرجوا معاها }

دينو : اطفال صغار وبنات فى عمر الزهور .. خطفتهم الحرب من حضن البراءة

عامر : يمكن الحرب فرضت علينا وعلى ابنائنا درس كان لازم نتعلمه من زمان

دينو : اى درس

عامر : البقاء للاقوى .. هو ده الدرس اللى اصبحت فرض نعلمه لابنائنا .. لكن لو كنا استعدين

ا للحرب دى من بدرى .. وعملنا خلايا مقاومة قبل ما نطلب الانفصال . كان الحال اتغير

دينو : ومين كان ح يمدنا بالسلاح .. دول كانوا قافلين الحدود وحرميننا من حقوقنا المدنية .

وحتى العسكرية .. اعلى رتبة لمسلم هى ضابط ونادرا ما زادت عن كده . يعنى الخبرة

العسكرية . غير موجوده . مفيش غير اللجوء لتجار السلاح والمافيا .. ودى بتطلب

مبالغ هائلة .. مين ح يمدنا بيها والدول الاسلامية اما خاضعة لنفوذ اجنبى بيحركها زى

ما هو عاوز .. او دول فقيرة وضعيفة او .. { تدخل حسناء }

عامر : مكتوب على امتنا تبقى مداس للكلاب والاندال { صوت انفجار }

دينو : الابطال عملوها الجميع الله اكبر

حسناء : امتنا عمرها ما ح تبقى مداس لو اعتصمنا بحبل الله واتحدنا .. و الدليل على كده وجود

مقاتلين انضموا لخلايا المقاومة المختلفة .. من الدول الاسلامية وبيحاربوا ببسالة

عامر : فكرتيني فيه دفعه من المقاتلين الاجانب هتتضم لينا قريب .. و لازم حد يكون فى استقبالهم .

بس لازم نتأكد من نواياهم الاول قبل ما يشتركوا معنا فى الحرب

دينو : امتى جاين

عامر : بعد يومين { صمت } فى حالة فشل مهمة زملائنا ح يستنى حد منكم هنا لاستقبالهم

دينو : انا لازم اشارك

حسناء : وانا { صمت } وبعدين انت بتفرض ليه الاسوا .. ابطالنا ح يجوا غانمين ان شاء الله

عامر : دى امنيتى .. بس فى الحرب توقعى الاسوا .. واتصرف على اساسه

دينو : خطط بديلة يعنى { صوت طلقات رصاص }

حسناء : بمناسبة الخطط .. ايه الهدف القادم

عامر : كله متوقف على نجاح زملائنا .. { صمت . لحسناء } دخلى عناصر المقاومة اللي ح تشارك

معانا فى العملية

{ مجموعة مسلحة من الشباب والفتيات والفتيان .. بيدخلوا فى صف منتظم والتزام عسكرى }

عامر : (لدينو) مجموعة من الابطال ح يشاركونا العملية الجديدة { للجنود } اعرفكم

بدينو مقاتل اكيد بعضكم يعرفوا .. او شارك فى احد العمليات اللي قام بيها

دينو : انا سعيد بالتعرف عليكم .. واتمنى التوفيق لينا ولزملائنا { مداعبا } وان كنت ملاحظ ان عدد

الفتيات بدا يزيد فى المقاومة .. مش الحرب خطر عليكم

رضوى : { باعتزاز } الحرب ما بتفرقش بين راجل وامرة .. احنا بتعرض للتعذيب الجسدى

والنفسى اكتر منكم

شيماء : الجيش الصربى بيعتبرنا غنائم حرب .. سبايا ووسائل ترفيه

دينو : انا اسف . مقصدهش انى اضايقكم بكلامى { يلتفت للفتيان } ياولاد انتو مش خايفين

الفتيان : لا .. احنا ابطال

دينو : { يتقدم من حميد } انت اسمك ايه

حميد : انا المقاتل حميد .. شاركت فى عملية فدائية والحمد لله اثبت كفاءتى

دينو : عظيم .. سنك كام

حميد : ستاشر سنه .. لكن اهزم ستاشر جندى صربى جبان

دينو : اهلا بيكم يا مستقبل البوسنة { لعامر } ما ضاع حقه وراءه ابطال مؤمنين به

عامر : { ينظر فى ساعته } فاضل ساعة وخمس دقائق وثلاثين ثانية ويصل اخوانا سالمين باذن الله

دينو : (لعامر) تعرف سلوبودان وكارازديتش بيفكروني بمين

عامر : بمين

دينو : سلوبودان بالامبراطور جوزيف جوتر

عامر : امبراطور النمسا اللي اذاق البوسنيين العذاب والهوان

دينو : وكاراذديتش

عامر : نسخة طبق الاصل من مسيو كاللي

دينو : حاكم البوسنة والمهرسك واللي نفذ برامج ارهابية وترويعية لارتداد البوسنيين عن الاسلام

حميد : مسيو كاللي كانوا بيدرسوه لينا علي انه اعظم حكام البوسنة

.. وانه ادخل البوسنة لقطار التقدم المسيحي الاوروبي

دينو : كذب وتزييف للتاريخ .. اللي حاولوا علي مدار عشرات السنين يروجوا له

عامر : (حميد) اللي أتعرض له اجدادك البوسنيين من اضطهاد عرقي سواء بالقتل او التشريد

ومحاولة تغيير العقيدة بالقوة وتزييف الحقائق التاريخية .. ما اتعرضتش له دولة

أو مجموعة عرقية في العالم وصمدت زينا

دينو : البوسنيين قوم اشداء قابضين علي دينهم بقوة

عامر : القابض علي دينه كالقابض علي الجمر كما قال الرسول الكريم

دينو : صلي الله عليه وسلم

عامر ثقنتا بالله وبدينا وبأنفسنا ليس لها حدود

حميد : احنا فاكي يا بوسنة

دينو : (حميد) روح اتدرب مع زملائك يا بطل

عامر : سامع صوت

{ يدخل شاكر وراجي ومجموعة من المقاتلين وقد صبغوا وجوههم جميعا }

عامر : الإبطال وصلوا

{ الجنود يهللون . زغاريد }

دينو : حمد الله على سلامتكم

شاكر : الله يسلمك

حسناء : سمعنا اصوات الانفجارات وكأنها سيمفونية لبيتهوفن (يضحكوا)

شاكر مش عازرة تنسي انك أكبر عازفة بيانوا في أوروبا كلها

حسناء : ومؤلفة الحان كمان

راجي : طبعاً ومين ينسي المقطوعات الوطنية اللي اهبث حماس البوسنيين كلهم

حسناء : مجاملة لطيفة منك

شاكر : انت محرومة هنا من العزف والتأليف

حسناء : التضحية من اجل الوطن هي السيمفونية الأعظم اللي بيعزفها شعب عظيم
 عامر : (مقاطعا) خيلنا في الجد .. ازاى قدرتوا تحترقوا دفاعات العدو
 (حسناء تنتحي جانبا حزينة)

شاكر : كانت لحظات قاسية

راجى : { بحماس } بالعزيمة والارادة قدرنا بفضل الله .. ندوقهم مرارة الهزيمة
 دينو : الله اكبر { الجميع يرد } الله اكبر
 الجميع : الله اكبر

شاكر : عامر متهيالى انك تريح نفسك المرة دى كمان لحد ما تتعافى
 عامر : { بغضب } لا أنا ح شارك ..أرجوك سيبنى أؤدي دوري نحو وطني
 شاكر : أنت عنيد { يحضنه } بس بطل
 عامر : دمر توا المعسكر

شاكر : واسرنا كل اللي تبقى منهم على قيد الحياة
 راجى : مش بس كده .. احنا قدرنا نحصل على ذخيرة وسلاح منهم .. تعوض اللي فقدناه في
 العمليات اللي قومنا بيها
 الجميع : الله اكبر

شاكر : إقرأؤ الفاتحة على روح زملائنا اللي فقدناهم في العملية دى { يرفعوا ايديهم . يقرأؤ }
 دينو : ما لاقتوش حد من اهلى فى المعسكر الصربى
 شاكر : للاسف اول ما هجمنا .. قتلوا الاسرى .. واللى عاش مات اثناء القتال انا اسف { صمت }
 بس معنا فى الاسرى اتنين كانوا مشاركين فى العمليات الاجرامية فى شيلدوفيتشى وروجاتسيا . يمكن تقدر
 تتعرف عليهم او يفيدونا بحاجة عنهم
 دينو : { بلهفة } اشوفهم
 شاكر : { لراجى } خليفهم يدخلوا
 { يخرج راجى }

شاكر : (لحسناء) باين عليكى زعلانة من حاجة
 حسناء : انا

شاكر : ايوه انتي

حسناء : انا سعيدة .. سعيدة فعلا

حميد : (مندفعا) زعلانة من المقاتل عامر عشان قاطعها في الكلام

شاكر : الكلام ده صحيح

حسناء : لا المقاتل عامر عنده حق احنا في وسط حرب لا ترحم

ومفيش وقت نضيعه في الكلام عن امورنا الشخصية

شاكر : لو انجرفنا مع قسوة الحرب ونسينا الحياة هنتحول لوحوش بتحارب بدون هدف

عامر : ماترعليش مني انا مندفع دايما لكن كل تقديري واحترمي ليكي ولفنك

شاكر : علي فكرة عامر اكرر واحد بينفعل مع الحانك

(تضحك حسناء)

شاكر : سامحتيه وللا نعاقيه بتهمة الإساءة لزهرة جميلة زيك

حسناء : تعاقب قائدتي واخويا اللي باكن له كل احترام ... انا فعلا مش زعلانة

(يدخل جنديين اثار الحرب بادية عليهم . مدعورين . يدفعهم راجي بقسوة)

شاكر : لا ياراجي احنا لازم نعامل ضيوفنا احسن معاملة

راجي : اديني الامر وانا أقتلهم

اسير [١] : (مدعور) احنا تحت امركم . بس اتركونا نعيش

اسير : [٢] ح نقول كل حاجة عاوزين تعرفوها

دينو : { يتفحص اسير ١ . يمسك بتلابيبه } انت كنت مع المجموعة اللي هاجمت بيتنا

اسير [١] : { بخوف } هو انت .. انا ماليش دعوة .. انا كنت بانفذ الاوامر

دينو : عملتوا ايه في اهلي

(شاكر يخلص الاسير من دينو)

شاكر : اهدا .. انا ح اعرف اخليه يقول كل حاجة .. بس اهدا

شاكر : (للاسير) اسمع لو قلت كل حاجة تعرفها عن اهل دينو ح ترجعوا لاهلكم بسلام . اما لو ..

اسير [١] : { مقاطعا } ح اقول ..

الأسير : (لاهثا) والدته واخته لسه على قيد الحياة

دينو : الحمد لله

شاكر : يعني ما كانوش في المعسكر ساعه ما هاجمناه

اسير [٢] : لا

شاكر : راحو فين (يصمت الاسير . مهددا) شكلك مش عاوز ترجع لاهلك

اسير [١] : الاشكال بتتشابه علينا .. والاسرى كثير هنفرق بينهم ازاى

شاكر : ح ترجع للغموض تانى

اسير [١] : انا هاقول لحضرتك .. انا كنت موجود لما هاجمنا بيته { يشير لدينو } وجريت وراه لما

هرب .. والحق انا تعبت من الجرى وراه قلت ارجع للضابط وابلغه لكنى خفت

شاكر : { مقاطعا } من غير تفاصيل كثيره ودتوهم فين

اسير [١] : معسكر سونيا { صمت } واحد من الضباط اخدهم المعسكر هناك عشان { صمت } انت

عارف ان الضابط بيكرهك بشكل خاص لان هروبك خلاهم يوقفوه عن المشاركة

في العمليات الحربية

دينو : لازم اخلصهم من ايديه

شاكر : كده من غير خطه

دينو : كل دقيقة بتمر فيها خطر على اهلى

اسير [١] : ح تسيبونا نعيش

اسير [٢] : احنا قولنا كل حاجة .. مش كده

شاكر : { لاحد جنوده } خدهم بره دلوقتى

اسير [١] : { وهو خارج } المسلم بيفى بوعدده .. مش كده

شاكر : كده ياعامر انت عارف العملية الجديدة فين

عامر : معسكر سونيا

شاكر : صح .. فيه صعوبة في المعسكر ده

دينو : مهما كانت الصعوبة .. ح اقوم بالعملية دى

شاكر : ماتخليش العواطف تغلبك . انت لو مت وانت بتحاول تنقذ اهلك تبقى ماعملتش حاجة .

حسناء : { لشاكر } ايه الصعوبة في العملية

شاكر : { يتجه للخريطة } دى في الحقيقة عبارة عن مدرسة محاطة بحراسة شديدة اسمع ان هناك عدد هائل

من المعتقلين .. اللى بيواجهوا اشد انواع التعذيب .. والوصول للمعسكر محفوف بالمخاطر .. لذا يجب

الحذر الشديد .

عامر : ممكن بالضغط على الولاد دول .. نعرف منهم نقاط الضعف والقوة في الحراسة حوالين المدرسة

شاكر : هاتهم حجرة الاجتماعات .. عشان نشوف ح نخترق المدرسة دى ازاى

{ يخرج شاكر وعامر وراجى ودينو وحسناء }

رضوى : { لشيما } انا عوزاك فى كلمة { تنتحى به جانبنا } انا خايقة

شيما : خايقة من ايه

رضوى : من الموت

شيما : خلاص خليك هنا .. وبرضه ح تخدمى المقاومة

رضوى : بس انا عاوزة احارب .. نفسى اشارك فى تحرير بلادى

شيما : حيرتىنى معاك { مطمئنة } عارفه الموت فى عملية زى دى معناه ايه

رضوى : ايه

شيما : الشهادة . تدخلنى اللجنة مع الابرار والصالحين بعيد عن الحروب والصراعات والاحقاد .. فى جو

كله حب وونام

رضوى : { تردد بسعادة } الشهادة .. نفسى انول الشهادة { بتردد } بس فيه نوع من الموت اصعب

من الموت نفسه

شيما : هو الموت بقى انواع

رضوى : الاغتصاب .. انتى عارفه لو وقعنا فى ايديهم هيحصل لينا ايه { حالة من الوجوم تصيبهم }

رضوى : عاوزك توعدىنى بحاجة

شيما : ايه هيه

رضوى : اوعدىنى الاول

شيما : اوعدك

رضوى : لو لاقيتنى وقعت فى ايديهم .. تقتلىنى

شيما (باستغراب) اقتلك بس

رضوى : اوعدىنى .. وانا برضه اوعدك انى ح اقتلك { تنظر اليها شيما بتعجب } لو وقعتى فى ايدهم

حميد : { يقترب من شيما } انتى فيكى شبه كبير من اختى

شيما : انا يسعدنى انى اكون ختك

رضوى : هيه اختك فىن دلوقتى

حميد : ماتت .. او بمعنى اصح اتقتلت

رضوى : انا اسفة ... وارجوك تعتبرنا اخواتك

حميد : انا راجل .. واختى ماتت شهيدة ... واهلى كمان

رضوى : احنا اهلك

حميد : لكن انتوا عاوزين تقتلوا بعض ليه .. مين قال اصلا انكم هتتاربوا

رضوي : امال احنا جينا هنا ليه

حميد : عشان تتدربوا .. ولما تجيدوا استخدام السلاح ساعتها تاربوا

شيماء : طيب ما انت جديد زينا

رضوي : وللا عشان انت ولد هتتارب واحنا لأ

حميد : أنا أقدر استخدم السلاح كويس .. وبعدين حتي لو مسكوني وقتلوني ما ليش

حد بقتقدي أو يحزن عليه .. الحرب هي وسيلتي الوحيدة عشان أرد دين

الصرب بعد ما أبادوا أهلي وأبناء الوطن

رضوي : إحنا أملنا نحارب وأكد القائد

شيماء : (مقاطعة) هو فيه لنا عمل تاني هنا غير اننا نحارب (تدخل حسناء)

حسناء : فيه اعمال كتيرة تقدرؤا تشاركوا فيها كنساء وطنيات غير السلاح

رضوي : زي ايه

حسناء : الحرب مش سلاح وبس

شيماء : امال ايه

حسناء : فيه امداد وتموين .. فيه عملكم كأطباء

رضوي : انتي عرفتي

حسناء : مش عارفة كنتوا محبيين ليه

شيماء : لأن الطب ما أسعفناش في انقاذ حيتة أهالينا وجيرانا

رضوي : منظر الجثث كان فوق احتمالنا .. مش متخيلة اني ممكن امد ايدي وأعالج مريض

وأنقذ حياته من الموت

حسناء : الحقيقة انكم محتاجين للكثير من النضج والخبرة عشان تقدرؤا تتعاملوا مع الموقف الراهن اللي

بتمر بيه البلاد .. دولتنا دولة ابطال وتاريخنا كله نضال .. واجهنا حملات تطهير عرقي

وتنصير لو اتعرضت له أي امة تانية كانت فنت لكن صلابة أمتنا هو اللي خلانا لحد

دلوقتي محافظين علي كيان وهيكل امتنا .. الامة محتاجة لكم ومحتاجة لكل عنصر

من عناصرها .. فكروا في كلامي وحددوا موقفكم

رضوي : بدون تفكير احنا فدا تراب بلادنا

شيماء : احنا لنا دور مهم لازم نؤديه

شيماء : هنكون عون للمقاومة

حسناء : وعد

رضوي : هنساعد علي قد ما نقدر

حسناء : شعور جميل

حميد : وأنا

حسناء : انت ولد شهم

حميد : ان راجل

حسناء : اللي في سنك دلوقتي في المدرسة

حميد : انا دلوقتي راجل وهيبق معايا سلاح وهأقتل الصرب زي ما قتلونا

حسناء : الحرب قصت علي براءة أولادنا .. الصرب حولونا لوحوش

حميد : وانا وحش

(يدخل شاكر ودينو وراجي وعامر)

شاكر : سامع حد بيتكلم عن وحوش هنا .. هو احنا عندنا وحوش يا حسناء

حسناء : (تشير لحميد) الوحش اللي ما بيخافش من الصرب

دينو : صحيح يا حميد

حميد : مستني الفرصة عشن أثبت لكم اني قوي .. وأقدر اواجه الصرب

دينو : ما تستعجلش .. دورك اكيد جاي

شاكر : (لحسناء) خدي الأبطال عشان يرتاحوا

حسناء : يللا يا ابطال

(يخرجوا. يبقي عامر ودينو وشاكر)

شاكر : { المجموعة } عرفتوا ح تعملوا ايه

دينو : باذن الله ح نتوفق

عامر : فيه موضوع لازم نتكلم فيه

دينو : بعد العملية

شاكر : مالكم فيه حاجة مخينها عليه

دينو : موضوع يمكن تأجيله دلوقتي

شاكر : موضوع ايه

عامر : بخصوص المتطوعين اللي بيحاربوا معنا من الدول الصديقة

شاكر : ما لهم حصل حاجة منهم في غيابي

دينو : عامر قلقان لاي مجموعة منهم تكون له أجندة خاصة بعد الحرب يحاول ينفذها

علي حساب مستقبل البلاد

عامر : وجودهم في فصائل وحدهم من غير اشراف مننا ممكن يمثل خطر علينا

شاكر : حنا فصيل من فصائل المقاومة اللي بيرأسها كلها السيد علي عزت بيحوفيش

ومالناش سلطة علي غيرنا من الفصائل

عامر : بس احنا لينا سلطة علي منطقتنا اللي بتعمل فيها خمس فصائل من الدول الاسلامية

وده عدد كبير

شاكر : المطلوب ايه

عامر : انهم يحاربوا تحت مظلتنا

راجي : عامر قلقان من من ان يكون لهم انتماءات للقاعدة في افغانستان او للاحزاب المتشددة في الجزائر

دينو : ودول بيحملوا ايدولوجيات تختلف تماما عن ايدولوجياتنا

شاكر : خلاص أبعت للقيادة العسكرية بمخاوفكم وهي اللي تبت في الموضوع .. ولحد ما ده يحصل

هنعيد توزيعهم بحيث يكونوا تحت قيادة رجالتنا .. بس حذاري من أي استفزاز ليهم

مش عاوزين المقاومة تتفرق وده اللي عاوزه عدونا

راجي : الموضوع محتاج لحكمة العسكرية و السياسية

شاكر : انا هأكلفك بالملف ده كله .. انا خارج للمهمة الجاية تحت قيادة عامر

عامر : انت بطل حقيقي يا شاكر بس انا باعفيك من المهمة

شاكر : (مستغربا) ليه

عامر : انت جاي تعبان ولو خرجت معنا بالحال ده تتعرض للخطر

شاكر : بس انا أقدر أحارب

دينو : محدش يقدر يشكك في قدرتك علي الحرب

راجي : كلامهم مضبوط لاننا ورانا عمل مهم لازم ننهيه في غياب الرجالة

عامر : (لشاكر) وللا انت مش واثق في قيادتي

شاكر : اثق فيك جدا

دينو : خلاص ارتاح .. واستني اخبار سعيدة جدا

شاكر : لا اله الا الله

الجميع : محمد رسول الله

(يخرج الجميع عدا شاكر وراجي)

شاكر : انا مرهق جدا وعاوز انام

راجي : تفتكر هنقدر ننام

شاكر : ازاى المقاومة تنام وفيه محتل شرس بيحاول يقضي عليها

(يخرج شاكر وراجي . تدخل حسناء وهي تعزف لحن حزين)

اظلام

اللوحة الاخيرة

المكان : معسكر سونيا { مدرسة }

الديكور : فصل في مدرسة .. مكشوف للخارج من الشبايك الزجاجية الجانبية تحت متراصة فوق بعضها

.. بطاين ملقاه على الارض .. باب وحيد يؤدى لممر خارجي . تسمع دائما خطوات الجنود الصرب في

الممر على فترات . واصوات المحتجزات في الحجرات الاخرى وهن يتوسلن للجنود الصرب .

(نورا واقفة امام الشباك ، تحاول تتبع الصوت القادم من الحجرة الجانبية فضيلة وجميلة

وسلوى جالسات على الارض . جميلة فتاة صغيرة في السن بالرغم من جسمها ينئى بغير ذلك اما سلوى

فيبدو عليها اثار الحمل)

فضيلة : { لنورا } خايفة

نورا : { بعصية } اخاف من ايه .. اخاف .. طبعاً اخاف .. لينا اسبوع واكيد الكلاب مدبرين لنا

حاجة كبيرة { لامها } انتى مش خايفة

فضيلة : بعد ما فقدت زوجى وابنى ما عدش فيه مجال للخوف

(يقف جندي امام الشباك . تصرخ نورا متراجعة)

فضيلة : مالك

(نورا تشير للشباك . فضيلة تبصق على الارض . الجندي يشير لها اشارات يفهم

منها انه يريدھا)

نورا : { لفضيلة } شايقة بيص ليه ازاي .. شايقة ابتسامته الوقحة

فضيلة : اسمعي { مهددة } لو استمررت على الضعف ده .. ح اقتلك انا بايدى .

نورا : { مندهشة } تقتليني

فضيلة : اصلي طولك .. وماتديهمش فرصه يتلذذوا بادخال الرعب لقلوبنا . توعدينى

نورا : حاضر حاضر .. اوعذك انى ح اقاوم لحد اخر نفس فى حياتى

{ صوت خطوات عالية يفتح الباب جندى صربى يلقي بكسرات الخبز الجاف . وابريق ماء . يغلق الباب {

سلمى : انا جعانة قوى .. { تاخذ كسرة خبز . وتنظر حولها } ما حدش عاوز ياكل .. ده عيش ناشف وده ابريق ميه .. { تشمه بتائف } ريحته وحشه قوى { للجميع } كلوا علشان نقدر

نقاوم .

(تنظر الى بطنها المنتفخة من الحمل . بمرارة) تقاوم

نورا : { مشجعة } يللا يا امى يللا يا جميلة خلونا ناكل علشان نعيش .. ونواجههم بذهن صافى

(توزع نورا كسرات الخبز على الجميع . يحاولوا الاكل بصعوبة . يشربون)

جميلة : { لسلمى } تفكرى انهم ح يقتلونا

سلمى : { تشير لبطنها } فيه حاجات اصعب من القتل

فضيلة : { زاجرة } حاسبى على كلامى (لجميلة مطمئنة) طفلة جميلة زيك يا جميلة مش ممكن

حد يفكر يقتلها .

سلمى : مسير الدوريجى عليها .. وتعرف كل حاجة

فضيلة : اياك تتكلمى معاها فى حاجة زى كده

جميلة : { تبكى } انا عارفه انهم ح يقتلونا زى ما قتلوا اهلى كلهم

فضيلة : انت ح تعيش لانك املنا كلنا فى بكرة

سلمى : وعلشان كده مش ح يرحمونا ولا حيرحمونا .. احنا هنا ٣٠٠ واحدة موزعيننا

حسب الاقدمية ويعنى الدور جاى علينا كلنا .

نورا : ح نقاوم

سلمى : { بسخرية } حد يقاوم الموت ده كاس ودابير

فضيلة : (تصفع سلمى) اخرسي بأقولك

سلمى : بتضربيني ليه

نورا : ماما عملي كده ليه

فضيلة : لأن كلامك بيضعف همتهم .. فاهمة

نورا : هما بيعملوا كده ليه

سلمى : لانهم بيعتبرونا جزء من المعركة .. لازم يثبتوا جدارتهم فيه انا عارفه هما مستنين لحد

ما اولد ويحرموني من طفلى ويخلوه طفل صربى .. وساعتها يا اما يخلصوا منى

أو يخلوني لمعتهم

جميلة : انا اختى قتلت نفسها .. ولما سالتها وهيه بتطلع في الروح قالت ليه لما تكبرى ح تفهمى

سلمى : اختك شجاعة .. بطلة .. ياريتنى اقدر اعمل زيها .. بس انا جبانة

نورا : عليه اتاخرت خالص .. { صمت } انا قلقانه عليها

فضيلة : ربنا يسترها عليها

نورا : { لسلمى } انت وقعت فى ايدهم ازاي

سلمى : كنت فى مدينة موستار .. ولما هجم الكروات علينا ودمروا المدينة الجميلة . حرقوا

وقتلوا باختصار حولوها لمدينة اشباح .. اسرونا وفضلوا يعذبونا لحد ما الصرب

استولوا على المنطقة اللى فيها المعتقل . وانتقلت الملكية ليهم .. لاحد خد راينا ولا

استشارنا وكاننا قطع اثاث بيتصرفوا فيها زى ما هم عاوزين دون رقيب او وازع من ضمير

{ تدخل عليه وقد بدا عليها الاعياء والافئام . تسقط مغشيا عليها نورا وسلوى ياخذانها بجوار الحائط

(

نورا : جرى لك ايه يا علىة

(تنظر اليهم بذهول . جميلة تزحف بعيد عنهم والرعب بادى عليها)

فضيلة : (لعلية) ردى عليا يابنتى .. طميننى .. انت بخير

سلمى : (ساخطة) الكلاب .. اذوها { تحبط بطنها بعنف } احنا مالناش مكان فى العالم ده

(تتدخل نورا وتمنعها من خبط بطنها) سيبينى

نورا : انت بتعملى ايه يا مجنونه . لو حاولتى تسقطى الجنين اللى فى بطنك ح تموتى

سلمى : الموت ارحم { تواصل الخبط } ده ابن حرام { باستعطاف } ساعديني ارجوكى انا عارفه

انى جبانه لكن انتى قوية عنيكى بتقول كده الولد ده مش لازم يتولد ح ياخدوه ويبقى

واحد منهم .. وساعتها يملوه بالاحقاد على اهله ويبقى زيهم

نورا : حياتك اهم من انك تبدديشان اوهام في دماغك وبعدين انتي عارفه منين ان الازمه دى
ح تستمر اكثر من كده

سلمى : ماتخدعش نفسك ... الازمة دى مستمرة وعمرها ما ح تنتهى الا بنهايتنا

فضيلة : { بسعادة } عليه بدا تفوق

(تقترب منها سلمى ونورا . جميلة ما زالت متكورة على نفسها دون ان يدري بها احد)

فضيلة : حمد لله على سلامتكم يابنتي

عليه : { كالحمومة } قلت لهم ارحموني . قالوا ادخلي دينا . قلت لهم اقتلونى قالوا الموت رحمة ..

وانت حلوة وصغيرة ازاي تموتى قبل ما تنجى لنا اولاد صريين

(تبكى . صوت نشيج سلمى . جميلة ترتعد خائفة)

عليه : مارحموش ضعفى . اتكاتروا علي مقدرتش احمى نفسى

فضيلة : ابكى . فرجى عن نفسك . فرج ربنا قريب { تتحسس جبهتها } حرارتها مرتفعة لازم

تنخفض ليها الحرارة باى شكل { لنورا } فيه شوية ميه فى الابريق { تذهب لاحضارها }

تقرا اية قرانية . تاخذ ابريق الماء من نورا . تخلع طرحتها تبلها بالماء وتضعها على

جين عليه . بسم الله الشافى العافى

نورا : رحمتك يارحيم ... عدلك يا عادل

سلمى : ايه الحكمه فى اللى بيحصل لنا .. الارض بقت خراب والا

نورا : { تقاطعها } اسكتى يا مجنونه

سلمى : الالهات والصرخات والتوسلات والدعوات بتجلجل فى بطن السماء كل لحظة ومفيش

شعاع امل .. مفيش دليل على وجود عدالة سماوية

نورا : استغفرى ربك ماتكفرش برحمة ربنا

سلمى : ماعدتش واثقة

فضيلة : اخرسى . اوعى تنطقى باى كلمة تانى والا انا ح اموتك

سلمى : { تدرك خطاها } انا قلت ايه .. استغفر الله العظيم

سلمى : الجراح كترت فى قلبى . مابقتش اعرف غير الكره والحقد على الدنيا .. دموعى جفت حتى الاله

مش راضية تطلع

عليه : { تهذى } ارحموني سيبوني

نورا : عليه

فضيلة : سيبها ترتاح .. السخونية بتزيد فى جسمها . وربنا يستر

سلمى : { لفضيلة } تفتكرى ممكن حد يتزوجنى بعد كل اللى حصل ليه

فضيلة : الاف الشباب بيتمنوا شابه جميلة زيك و اخلاقها عاليه

سلمى : { بحرارة } هيا اللى تحمل سفاح .. يبقى عندها اخلاق

فضية : وانتى ذنبك ايه

عليه : ارحمنى

سلمى : وحتى لو لقيت شاب مناسب تفتكرى ممكن امر بتجربة الزواج تانى .. صعب

عليه : سيبونى

نورا : هيه جميله فىن { ينظروا جميعا الى جميلة . تنظر اليهم مذعورة } يا خبر ازاي نسيناك

فضيلة : انشغلنا عنك يا بنتى

(تقترب من نورا تنكمش اكتر وقمهم)

نورا : خايقة

(تحاول فضيلة طمئنيتها . تتشابك اكتر)

فضيلة : اهدئى

نورا : خايقة

فضيلة : انت لسه صغيرة على الهم ده كله

نورا : خايقة

فضيلة : { لنفسها } مش قادرة اطمئنك على نفسك واقول لك محدش ح يلمسك لاني محتاجة حد

يصرخ فى وشى يقولى انت فى امان

جميلة : { تفلت من نورا . تصرخ } رجعونى قريقتى .. عاوزه امشى من هنا . مش عاوزه حد يقرب منى

(حالة وجوم تصيب الجميع . تعود جميلة للجلوس على الارض والتكور وقمهم .

صوت الباب يفتح . تبعد نورا وسلمى الى نهاية الحجرة بينما تفر جميلة بعيدا . يدخل ميكولا)

فضيلة : { تتجه ناحية ميكولا متنمرة . ميكولا يتراجع } تعالى يا جبان

ميكولا : (حاملا ست صوانى للاكل بصعوبة) انا .. انا ... الاكل .. انا الاكل .. ضع الصوانى على

احد التخت انا ما عملتش حاجه ... انا حتى عندى عجز .. اسالوا (متداركا) مش ح اقول لكم . ده

.... وانا صغير ... لا لا ... مش هاتكلم

سلمى : كلاب

ميكولا : دى شتيمه لا مش شتيمه ممكن تكون

فضيلة : (تفرغ عصبيتها فى ميكولا) انتوا ايه .. مفيش عندكم رحمة .. فاكرينا عبيد عندكم

ح تعملوا فينا زى ما نتو عاوزين

ميكولا : انتو مش عبيد ... انتو عاهرات

فضيلة : يا كلب وكممان خلتنونا عاهرات

ميكولا : انا ما قلتش هما الى قالوا ... القائد قال اقول لكم خبر حلو

فضيلة : خبر ... حلو من وشك يا صرصار

ميكولا : (متعجبا) صرصار .. لا .. صرصار صرصار

فضيلة : خبر ايه

ميكولا : سمعت انهم ح طلقوا سراحكم انتوا وباقي النساء اللى فى المعسكر

نورا : (بسعادة) صحيح

ميكولا : اكيد .. (لنورا) انت جميلة

فضيلة : وبعدين كمل ... ايه المقابل قصاد العمل ده

ميكولا : ح يبادلوكم .. باسرى من جيشنا

نورا : الظاهر انه بيتكلم جد

ميكولا : طبعا جد (فضيلة) مالك حزينه افتكرت انك ح تتبسطى

فضيلة : ازاي وافق جيشنا على ده .. يطلقوا سراح جنودكم .. وهما عارفين ان الجنود دول

ح يرجعوا يحاربونا

ميكولا : على حد علمى .. قائدكم قال ان الرجاله يقدرنا يتحملوا الاسر لكن النساء لا

عليه : سيبونى اوعى حد يقرب منى

ميكولا : (لنورا) تعرفى انا بكره الحرب

نورا : وبتحارب ليه

ميكولا : (بهمس) انا لو رفضت ح يلفقو ليه قهقهه ويقتلونى .. اقولك سر

نورا : سر ايه

ميكولا : انا شفت اخوكى لما هرب

نورا : دينو عايش

فضيلة : صحيح ابني عايش

ميكولا : هـش ش .. بشویش انتوا عاوزينهم يقتلونى

فضيلة : حاضر بصوت واطى { بهمس } ابني عايش

ميكولا : انا شفته واحنا بنطارده .. كان مخي نفسه وسط بعض الجثث .. سيبتته

وعملت نفسى مش شايفه

فضيلة : وايه اللى خلاك تعرض نفسك للخطر

ميكولا : (بحزن) كرهت القتل .. كرهت الدم .. متصوريش صور الضحايا اللى كنا بنقتلهم

بدم بارد .. عمرها ما فارقت خيالى .. احنا بشر برضه .. بنحس بس تعملى

اياه لما الكره والطمع يجتمع فى قلوب القواد والجهلاء .. تعرفوا .

فضيلة : اياه

ميكولا : طول عمرهم فى الاصلاحية . بيعلمونا حاجة واحدة .. الكره . لكم كنا بنتعاطى الحقد والغل

مع كل وجه .. زى المخدرات بالضبط . كانوا بيحطوا هيكل لانسان مسلم .. ويخلونا نضرب فيه

بالعصى بلا رحمة .. ولانى دايم كنت باظهر قرفى من الى بيجرى كانوا دايم بيعايرونى بانى جبان ..

ضعيف .. واضطهدونى .. صحيح انا عارف ان ادراكى للامور ضعيف . زى ما تكون فيه سحابه على

مخى بتحجب عنى امور الحياه .. ولما رفضت اشارك فى الاغتصاب بحجة اخترعتها وهى انى عاجز عن

ممارسة { صمت } وصمونى بالعار وحولونى للخدمات المعاونة ... افشكروا انهم بيعاقبونى لكن كده

افضل

نورا : مش عارفه نصدقك .. بس ازاي نثق فى كلام صربى

ميكولا : مسير الايام تثبت لك .. صدق كلامى { لنفسه } لو تعرفى حبك غير فيه قد اياه

عليه : ارحمونى الجامعة .. الطب

فضيلة : { تقيس حرارتها فى حرارتها فى ارتفاع شديد

ميكولا : اشوف لها الدكتور

(يدخل الضابط ديفانوفيتش ومعه الجنود . نورا وسلمى يقفان بجانب جميلة.

فضيلة متمرة وهى تضع ضمادة على جبين عليه)

ميكولا : (للقائد) سيدى ... ممكن نستدعى الدكتور

الضابط : دكتور ليه .. نويت تموت وتريحنا

ميكولا : اصل .. احد .. { يشير لعليه } عي .. عيانة

القائد : { يصفعه } انت عار على جيش الصرب ضعيف

ميكولا : بتضربني ليه { صمت } انا باكرهك

الضابط : انت نسيت .. اول درس اتعلمته فى الحرب

ميكولا : { يبصق على الارض }

الضابط : { صفعة } احترام القائد ... عدم التعاطف مع العدو

ايفانوفيتش : لكن الدكتور

الضابط : اخرس .. مش كفاية ان زملائي بيشاركوا فى تطهير الارض من المسلمين الكلاب وانا

واقف هنا مع بغل زيك باسمع اخبار الحرب .. وكله بسبب هروب ابنها

الضابط : { لميكولا } بالمناسبة انت كنت مستفرد بالبنات الحلوة دى .. طبعاً مش علشان الترقية }

يضحك { ما انت زيك زيهم .. يا عاجز

ميكولا : انا ... ان .. انا راجل .. مش .. ست

الضابط : ح اقطع لسانك علشان ردك عليه .. تعرف ح وديك مستشفى المجانين

ميكولا : ياريت

ايفانوفيتش : { لميكولا } خذنى معاك

الضابط : الله ... الله ... ده تمرد

ايفانوفيتش : انا عاوز ارجع السجن .. هناك كنت باعمل حاجة مفيدة .. باعمل اثاث خشبية ..

كراسى .. دواليب .. كنت مبسوط .. باكره الدم .. ايدى ملونه بالدم ورائحتها { يشمها } ريحة دم ..

كرهت اللون الاحمر .. نفسى انزعه من جسمى

الضابط : يا عيني على جيش الصرب .. الى العالم كله بترتجف منه . ازاي نحقق حلمنا فى دولة صربيا

العظمى وعندنا بلاوى زيكم .. واحد متخلف والثاني اهيل انا ح احولكم لحكمة عسكرية

{ ينظر لعليه } ها .. جميلة الجميلات { ترتعد عليه } مالك .. انت نسييتنى بسرعه كده

فضيلة : ابعد عنها .. احنا دلوقت معدناش تحت سيطرتك

الضابط : ازاي يا حلوة

فضيلة : احنا عرفنا انكم ح تبادلونا مع اسرى حرب

الضابط : { ينظر بغضب لميكولا } لحقت تبلغهم يا كلب .. يا جاسوس

ميكولا : انا .. مش جاسوس .. والخبر ده كانوا ح يعرفوه دلوقت او بعدين

الضابط : يتسرب اسرار الجيش ويتقول مش جاسوس { لفضيلة } لسه فاضل ست ساعات على

التبادل .. يعني قدامنا وقت طويل نقدر نعمل فيه حاجات كتير يا حلوة .. { لاحد جنوده } هات

الست ده .. وتعالى ورايا

ميكولا : { يعترض طريق الجندى } لا

الضابط : بتقول ايه يا نحس

ميكولا : [باصرار] باقول سيهم

ايفانوفيتش : وانا برضه ..

الضابط : ده تمرد بقى .. والتمرد عقابه القتل { يطلق الرصاص على ميكولا وايفانوفيتش ويلتفت للجنود

{ هات الست دى وبنتها .. بينى وبينهم حساب طويل

فضيلة : { تقاوم دون جدوى } مش ح تفلتوا من العقاب

نورا : مسير العالم يعرف جرايمكم ويحاسبكم عليها { صوت طلقات رصاص بالخارج {

الضابط : ايه الضرب ده .. { للجنود } سيهم دلوقتي وتعالوا نشوف ايه اللي بيجرى بره { يدخل

جندى { حصل ايه

الجندى : ارهابيون مسلمين بيهاجموا معسكرنا

الضابط : جم لنا بنفسهم .. يللا بينا نلقنهم درس عمرهم ما ينسوه { يخرجوا {

فضيلة : { بفرحة } مش قلت لكم فرجه قريب

نورا : يارب وفقهم فى حل اسرنا { صوت تبادل اطلاق النار بيزيد ويقرب الجميلة { خلاص ح ترجعى

لاهلك { تقف جميلة وتجري الى نورا . ترمى فى حضنها { ايوه يا حبيبى ح تعودى لاهلك ولمدرستك

وحياتك

جميلة : بس اهلى ماتوا كلهم

فضيلة : احنا اهلك .. انت ح تيجى تعيشى معنا .. ايه رايك

جميلة : موافقة

فضيلة : تعالوا يا بنات حواليه { يتجمعوا حولها { يللا نقرا القرآن { يرددوا الايات فى خشوع يدخل

الضابط وجنديان بملابس ممزقة {

فضيلة : { للبنات { اقفوا فى الركن هناك { ينسحبوا بعيد . تساعد عليه على الوقوف تبعتها {

ص خارجى : استسلموا لنا .. مش عاوزين نستخدم العنف

الضابط : لو حد قرب حنقتل الاسرى

الام : { لنورا لفرعة { الصوت ده صوت ابني { سلمى تاخذ السلاح منيد ميكولا {

نورا : ايوه صحيح { يسمعهم احد الجنود . يتجه للضابط {

الجندي : الست اللي هناك بتقول ان الصوت اللي بيتكلم صوت ابنها { ويشير لفضيلة }
الضابط : رائع { للصوت الخارجى } امك واختك رهائن فى ايدينا .. لو وقفتموا فى طريق هروبنا .

ح نقتلهم

ص خارجى : { بتردد } سيينا نتشاور ثوانى . بس اوعى تاذى حد منهم والا

الضابط : بسرعه

سلمى : { لعله } انا معايا سلاح سرقته منه { تشير لميكولا }

عليه : { بهمس } هاتيه

سلمى : { بشك } ح تعملى بيه ايه

عليه : هاتى وبعدين اقولك

سلمى : { تعطيه لها بتوجس } خدى السلاح واوعى تكونى ناوية تعملى حاجه فى نفسك

عليه : ما تخافيش { تقرب من الضابط }

الضابط : { لعله } ارجعى مكانك { يصوب الجندي السلاح ناحيتها } تتظاهر بالتراجع ثم تحاول

الهجوم على الضابط { يقتلها الجندي }

الضابط : ده مصير اى واحده تعمل نفسها بطله .. يا عاهرات

سلمى : { بحزن . لعله } عملتى كده ليه

عليه : كان لازم اقتله . وادفعه ثمن جريمته

{ تموت . يضرب الضابط رصاصه لتهديديهم . يقفز عامر من الشباك . وقبل ان ينتبهوا

يدخل دينو وبقية الافراد من الباب . يستسلم الجميع . سلمى تاخذ السلاح من يد عليه)

دينو : امى جيبتي

(غير مصدقة)

دينو : انا ابنك نستيني

فضيلة : ابنى البطل .. حمد لله على سلامتك .. انت سليم وبخير

دينو : انا قدامك سليم وبصحة كويسة .. المهم انتي

فضيلة : (باكية) كنت فقدت الامل انى اشوفك

نورا : بتبكي ليه يا امى

فضيلة : ابوكم وحشني .. ومش عارفة هاعيش ازاي من غيره

نورا : بابا مات شهيد .. امال دينو يعمل ايه اللي خسر ابوه وزوجته وابنه اللي كانت حامله فيه

فضيلة : انا عارفة ان كلمات العزاء اللي في الدنيا كلها .. لا يمكن تطيب خاطرك ولا تخفف

من حزنك علي ابوك .. بس

دينو : ماما النار اللي جواي علي فقدان ابويا ومراقي هيه نفس النار اللي بتاكل عائلات بكاملها

في البوسنة دلوقتي .. واللي لازم نوقفها

نورا : احنا لازم ننضم للمقاومة

دينو : حد ازاكم

نورا : حد يقدر وانا اخت البطل

(تكشف ثلاث نساء عن وجوههم)

نورا: { باندهاش { معقول انتو.

ن ١ : مقاتلات .. اخواتكم

فضيلة : ومش خايفين يابنتي لتموتوا

ن ٢ : احنا موتنا قبل كده الف مرة وجه الوقت الى نرد لهم جزء من اللي عليهم

عامر : { يتأمل سلمى { معقولة .. اننى لسة على قيد الحياة

سلمى : انت مين

عامر : انا عامر جارك .. مش فاكراني

{ يقترب منها . تتراجع . تمسك بالسلاح مهدده {

سلمى : لو قرب منى ح موت نفسى

نورا : متخافيش يا سلمى .. انت دلوقتي وسط اهلك .. الايام الصعبة عدت . انتي دلوقتي حره

سلمى : { بمرارة { حرية .. جت متأخرة ... ما كل حاجة ضاعت

دينو : { لسلمى { بكرة قدامنا نعوض فيه كل اللي فاتنا

سلمى : حتى الشرف

ن ١ : للاسف الاغتصاب وسيلة كل محتل جبان

ن ٣ : بيحاولوا يكسروا روح العزة والكرامة داخلنا .. وبكده يزرعوا الياس في نفوسنا

ويستولوا على اراضينا

ن ٢ : { لسلمى { بدل ما تقتلى نفسك ونخسر مقاتله زيك ايدك في ايدنا تنضمي للمقاومة ونطهر بلادنا

منهم

{ سلمى تلقى السلاح . وتمد ايدها لرضوى { عظيم انت كده بقيتي بطلة مسلمة

نورا : وانا ح انضم لكم

فضيلة : وتسيبوني انا لوحدى .. انا كمان ح انضم ليكم { جميلة } ومعايا بنتى جميلة
دينو : الحمد لله . روح البطولة عادت للوطن .. وكده رجع الامل فى تحرير كل حته فى ارضنا

الضابط : اتراك كلاب { عامر يصوب للضابط }

دينو : لا سيبه .. دى حياته تساوى الكثير لنا { للجنود } هاتوهم معنا

عامر : يللا نخرج بسرعة من هنا .. قبل ما قوات الصرب تحاصرنا

(يخرجوا . عامر يتعثر فى خطواته)

عامر : اه (يعود دينو) الظاهر ان الرحلة انتهت يابطل

دينو : انت ح تكمل المشوار معنا

عامر : مفيش داعى للكلام الكثير الوقت ضيق والصرب زمانهم بيستعدوا للهجوم على المكان

دينو : انت ح تيجى معنا

عامر : آه.. البوسنة امانه فى ايديكم يا صديقى

(اظلام تدريجى)

ص . الراديو : توصلت المباحثات اليوم فى دايتون الى التوقيع على اتفاقية يتم بموجبها

وقف العمليات العسكرية خلال الايام القادمة تمهيدا لاقامة حكم تكون من
مجلس رئاسى صربى وبوسنى وكرواتى مشترك . هذا ومن المقرر ان تنتشر
قوات الامم المتحدة فى جميع انحاء البوسنة والمهرسك خلال الاسابيع القادمة .
تكرار للتوشيح : المصلين يا رسول الله يا نبى . يا رسول الله يا نبى
الامام : يا رسول الله يا نبى
المصلين : يا نبى

اظلام